

52
14

1614

3027

225-

LE

CATON

ERNANCOIS

AV ROY.

9

M. DC. XIV.

C A T O N

FRANCOIS

AND ROSE

THE DOG

LE CATON FRANCOIS

AVROY.

SIRE. Vn grand Philpophe ancien, voulant donner à ses disciples, vne regle pour composer leur vie, Entre plusieurs autres belles paroles, leur commanda celles-cy. De ne s'asseoir point sur le boisseau. Ne passer point la balance. Ne toucher pas à tous en la main. Et ne porter point d'anneau estroit. Bien que ces preceptes, **SIRE**, soient pris de choses vulgaires & qu'ils soient viles à tous hommes en general: Si est-ce que sans irreuerance on peut dire qu'ils le sont de tant plus aux Princes, & entre iceux à vostre Maiesté: Qu'estant en vn aage glissant & plein de difficultez, & en vne charge grande & peible, la praticque luy en deura estre familiere dés l'entree: Et voicy, **SIRE**, ce qu'il leur vouloit dire, De n'estre point oisif. De ne faire violence à la Iustice. Ne contracter legerement avec toutes personnes. Et ne s'affuiettir pas mal à propos, se mettant soy-mesmes aux fers. Leur faisant ces deffences il leur commandoit les choses opposees: Et cela, Sire, C'est le suiet de mon discours, choisi expressement entre plusieurs autres, qui seroient a desirer en personne si esleuee, si en ces quatre n'y auoit assez de quoy orner & embellir vne ame de soy-mesme desia bien conditionnee (comme est celle de vostre Maiesté) & la garantir de trouble. Si ie l'ose outre ma portee, ce ne sera pas outre le deuoir: Car, **SIRE**, ma suiection

naturelle, comme François, me rendant de tout
 poinct redevable à vostre Maïesté, & comme tels
 obligé à contribuer & de corps & d'ame, à l'hon-
 neur & grandeur de sa personne, & de ses Couron-
 nes, m'excuse en quelque sorte. Si entre si grand
 nombre de suieçts, viuans souz l'heureuse domina-
 tion de vostre Maïesté excellens en vertu, ie m'ad-
 uance (le plus indigne de tous) de porter à la face
 d'une Maïesté si puissante, ces paroles en termes si
 grossiers & esloignez de son merite. Ie le fay, Sire,
 porté à cela du priuilege de mon aage, lequel plus
 que septuagenaire me fait prendre ceste licence au-
 dacieuse. De mon naturel libre, qui ne pouuant
 desguiser les choses les dit comme il les pense : Et
 d'une affection violente qui me possède, de voir
 vostre Maïesté, comme assise sur les Throsnes de
 ses Ancestres, y regner en la mesme grandeur & au-
 ctorité que le feu Roy son pere s'y estoit acquise,
 Ce qui me fait le plus esperer de mon dessein, & de
 voir encores de mes yeux ce que ie souhaïtte (bien
 qu'accablé d'annees) C'est SIRE, que vostre Ma-
 jesté estant issuë d'une bonne tige, d'une souche
 si excellente, il ne peut que retenant beaucoup de
 la valeur de son tronc, le temps & la saison ne luy
 face produire les fruiçts dignes de si bonne plante,
 Si est-ce que comme les terres les plus grasses se
 ruinent faulte d'estre cultiuees, & ses ieunes arbres
 se font tortuës par la negligence : Aussi aduient-il
 quelquefois que les ames les mieux conditionnees
 s'abastardissent, ou par la malice de ceux qui en
 doiuent auoir le soin, ou par leur paresse & non-
 chalance. C'est pourquoy, SIRE, toute la France
 en general, & chacun de vos subieçts en particu-
 lier, ayant vn si grand interest de voir vostre Ma-

3

5

jesté, regner heureusement en son Estat, la voir aimée & obeye de ses peuples, honorée & crainte de ses voisins: Voir ses suiets iouyr sous son Empire d'une vie paisible: Elle souhaite que ceste ame qui luy est si chere, soit munie de qualitez propres à tels effects. Pour moy qui ay l'honneur d'estre l'un des membres de ce corps, ie penserois faire tort, & à la nature, & au deuoir, si contribuant le peu que Dieu m'a donné, ie ne supplioys tres-humblement vostre Maiesté, qu'ayant agreable à la sincerité de mes vœux, elle daigne recevoir ce discours pour gage de ma foy: & de mon affection, & me pardonne si en iceluy, i'use peut-estre d'une liberté en paroles plus hardies qu'il ne sembleroit licite à un suiet: donnant cela à mon zele. Les autres Roys veulent estre entretenus de paroles de foye, ils veulent estre flatez. Ceux de France ont tousiours souffert volontiers le langage de la vérité, ils la veulent toute nue, sans fard ny desguisement (preuue de grand courage & genereux.) Si vostre Maiesté agree ceste libre procedure, elle resmoignera de tant plus qu'estant fils d'un Grand pere, elle est avec ses Couronnes, & autres ses vertus Royales, aussi bien heritiere de celle-là: D'aimer la franchise de ses bons seruiteurs, & affectionnez suiets, veu mesmes que celle-cy n'a pour but, que l'honneur & grandeur de vostre Maiesté, le bien & repos de son Estat. & la felicité de tous ses peuples.

Ne vous asseez donc point, SIRE, sur le boisseau (pour vser des termes de nostre Sage.) La vie des Roys consiste en action, en action conuenable à leur qualité. Toute action des Princes n'est pas legitime: Celle-la seule l'est, qui a la vertu pour but,

& le bien & soulagement de leurs peuples.

Or, SIRE, vostre Maiefté sort d'un aage foible & debille, pour entrer en vn autre plus fort & vigoureux, & par consequent plus capable de choses grandes: En vn aage quiluy donnant le priuilege du Roy, le commandement absolu sur tant de peuples, l'oblige pareillement à en vser, non en ieune enfant, mais en Prince meur, en Prince tout formé. Iusques icy vostre bas aage vous a promis les actions dont vne enfance peut estre capable, et les vous seront desormais hors de saison: Ces actions sont trop basses pour vostre hauteur: il luy faut vn vol plus esleué: Il n'appartient qu'aux enfans de basse condition de demeurer enfans. Ceux des Roys doiuent estre hommes faicts dès le berceau. On lit d'Alexandre le Grand encores fort ieune, qu'estans venus quelques Ambassadeurs, de la part du Roy de Perse à Philippes son pere, qui n'estoit lors aux pays, les caressant, & festoyant, il ne leur faisoit point de demandes puerilles, comme ont accoustumé faire les autres enfans, touchant les vestemens de leur Roy, ou les iardins suspendus de Babylone: Mais des choses plus importantes d'un Empire: Comme du nombre de gens de guerre qu'entretenoit le Roy. En quel endroit de la bataille il se mettoit. Quel chemin estoit plus ouuert pour ceux qui vouloient aller de la mer Mediteranee aux prouinces havres. De maniere que ces Ambassadeurs estonnez declarerent que veritablement cet enfant estoit le grand Roy, & le leur le riche.

SIRE, telles demandes, sont demandes de Roys, non pas celles qui ont pour subiect des oyseaux des bestiolles: il leur faut vne estude plus serieuse:

comme ils sont appelez pour commander aux autres, aussi faut-il qu'ils se disposent de bonne heure à le bien faire. Les bonnes moeurs & bonnes conditions, estans qualitez qui ne s'impriment que par long trait de temps, & lesquelles il faut cultiuier de iour en iour : autrement les ames quelque bien nees qu'elles soient, vont perdant leur force & tombent en mauuaise habitude. L'arc se rompt s'il est trop tendu, & l'ame si elle est trop laschee. Il est trop dangereux à vn grand Roy de s'habituer à choses indignes de sa charge. C'est vn ply qu'il se donne, quel par apres (quand il le veut) il luy est tres-malaisé de changer : la coustume ayant vne tres-grande efficace en nature : si biē qu'il luy est infiniment necessaire de s'exercer de bonne heure à choses loüables, & consonantes à la qualité, & au rang qu'il tient entre les hommes. Car ce qui est vne fois changé contre nature, avec force & labeur deuient plus fort que ce qui estoit par nature. Si vostre Maiesté le fait avec soin & diligence, il est sans doute qu'elle en produira les fruiets, & que ceste bonne habitude s'imprimant en sa propre nature : desia preparee à receuoir le bien, luy fera trouuer les choses diciffiles, faciles à son vlsage.

Vn Ancien disoit, que pour rendre vn homme parfaitement vertueux, il faut que trois choses y concurrēt : La nature, la raison, & l'exercice. Vous auez, SIRE, la premiere qui s'est fait recongnoistre telle, dès vos plus ieunes ans : la seconde le temps la vous peut donner par la troisieme, si vous en auez la volonté : Et ceste volonté, SIRE, vous la deuez esmouuoir de tant plus qu'estant attriue au point où elle vous rendra, Vous n'en remportez

pas seulement la gloire de grand Monarque: mais de vertueux. Et en ces deux qualitez reside le comble de toute grandeur, & hauteſſe mondaine, par l'admiration quelle donne à tous, de la personne qui en est ornee & embellie.

Or, SIRE, c'est bien la plus vtile, & la plus belle action du Prince: d'autant qu'elle regarde premierement & principalement ſa personne propre & puis va par apres ruiſſelant ſur les ſuiets qui en approchent par l'vſage, & l'exercice qu'il en fait: Et ceſt vſage, SIRE, luy doit eſtre ordinaire & familier, comme la ſeule obligation à laquelle il eſt aſſuietry enuers ſes peuples. Obligation pourtant qui eſtât de l'eſſence de ſon office, l'oblige tellement que ſans ceſt exercice, il ceſſe d'eſtre ce qu'il eſt. Et c'eſt ce qui auoit meu les Egyptiens à figurer leur Roy Oliris, par la representation d'un œil, pour monſtrer que le Prince eſt l'œil de ſon peuple, par lequel il doit eſtre mené & conduit. Et certes il eſt bien raifonnable, puis que les peuples ſe ſoub-mettent volontiers à l'obeiſſance du Prince, & à ſuiure ſes inclinations, que luy-meſmes auſſi prenne la peine de leur commander, les choſes qu'il veut eſtre faites. On dit que le Roy de Perſe auoit d'ordinaire pres de luy un ſien Chambellan, ordonné à cela, qui tous les matins à ſon reſueil, luy venoit dire, SIRE, leue toy, & pouruoy aux affaires. Il faiſoit cela afin de reſueiller par ces aduertiffemēs ceſte partie de l'ame, en laquelle reſident les affections, & qui le plus ſouuent ſ'aſſoupit par l'aiſe & la volupté, à laquelle les Princes eſtans plus ſuiets, par la liberté que leur donne leur puiſſance abſoluë: Ils doiuent auſſi de tāt plus trauailler, d'en diuertir les obiets, en s'employant

ployant és choses dignes de leur occupation.

Vostre Majesté, **SIRE**, bien qu'encores foible d'espaules, si a-elle autant que Prince du monde, nombre de fardeaux pesans à supporter : Elle commande vn grand peuple, lequel pour sa multitude, & mesmes pour son naturel prompt & courageux a besoin d'vn mors d'vn grand artifice, pour estre maintenu en deuoir : Et c'est à quoy V. M. se doit occuper, le champ en est large & spacieux, & digne de l'occupation d'vn grand Prince. Vous en auez vne trace asseurée & domestique en la personne du feu Roy vostre pere, il vous doit seruir de Patron pour former toutes vos actions, comme le plus noble & le plus parfait que vostre Majesté peut eslire. On dit qu'Alexandre le Grand ne marchoit iamais sans son Homere (comme son Precepteur & Conseiller fidelle en ses guerres) V. M. **SIRE**, en doit faire autant de l'histoire du feu Roy son pere? elle y trouuera dequoy entretenir non seulement sa ieunesse, mais encores tous les aages de sa vie : Et s'il plaist à vostre Majesté d'en examiner les particules, elle y verra dés son commencement iusques à sa fin, vne suite continuelle de faicts memorables, autant & plus que de Prince qui fut iamais. Elle y remarquera dés ses ieunes ans, vne nourriture à la peine, vne vie champestre trauersée de mil accidents & entreprises : Et depuis vostre aage iusques à sa quarante-cinquesme année, des guerres perpetuelles : & encores depuis ce temps là, iusques à son deceds, vne solitude ordinaire pour affermir la paix à cest Estat, & le laisser à vostre Majesté, florissant en toutes sortes, comme il a fait : Si bien qu'on pourroit veritablement reduire sa vie à vne seule action : Exemple notable

pour vostre Maieſté , à fin que ſuiuant les pas d'un ſi grand Pere , elle traueille auſſi en ſon temps , pour conſeruer toutes choſes en l'eſtat qu'elle les a receuës.

SIRE , Dieu n'eſt pas plus admiré en la creation qu'en la conſeruation de ſes creatures : auſſi n'y a-il pas moins d'occupation pour vostre Maieſté , en l'entretienement de l'ordre , qu'au reglement qu'il y auoit eſtably : veu meſmes qu'il eſt impoſſible que vostre minorité ny ait alteré pluſieurs choſes par la licence que ſe donnent ceux qui ont en main , ſoubs l'autorité de vostre Maieſté , le maniment de vos affaires : Mais à cela **SIRE** , il vous faut traouiller courageuſement , & à l'exemple du feu Roy vostre Pere , vous en rendre capable par l'entretien que vous en deurent faire ceux qui par vostre Maieſté y ſeront employez. Il ne vous ſuffit pas d'en commettre le ſoin à vos Miniſtres , ſi vous n'y contribuez de vostre vigilance , autrement vous ſerez en danger d'eſtre trompé : Car ceſte ſollicitude , les retiendra en deuoir , & les enpeſchera d'entreprendre à vostre preiudice , ſçachant que vous ſerez capable de deſcouurir leurs fraudes. Le meſme exemple vous en pourra faire iuge : Iamais Prince ne fut mieux ſeruy que noſtre deſſunct Roy tant qu'il a veſcu , & la raiſon de cela ne ſe peut donner qu'à ſa diligence & capacité : Car , **SIRE** , vostre Maieſté eſt encores ſerui de la pluſpart des meſmes officiars , & cependant il n'y a nulle comparaiſon de l'Eſtat preſent à celui qui eſtoit alors. Chacun ſçait qu'outre les grandes & exceſſiues deſpenſes qu'il faiſoit & dedans & dehors , tant pour l'entretienement de la paix , & des garniſons , que pour les fortifications des places , baſtimens , &

autres extraordinaires, il faisoit tous les ans espar-
gue de plusieurs & grandes sommes de deniers, tes-
moins les sommes immenses qu'il vous auoit lais-
sees. Apresent que beaucoup de ses despences sont
cessees, neantmoins vostre Estat s'en va tomber en
la mesme necessité, d'où il l'auoit releué, par son
œconomie & bonne conduicte : D'où peut proue-
nir cela? que du mauuais mesnage des mesmes offi-
ciers, lesquels abusant de la foiblesse del'age de
vostre Maiesté, bastissent leurs maisons aux des-
pens du vostre? Cela doit mouuoir vostre Maie-
sté, SIRE, d'y auoir l'œil à fin de dissiper par vostre
regard ces broüillards, & y ramener la mesme clar-
té & lumiere qu'ils ont chassée, pour rair dans ce-
ste obscurité. Pource faire vostre Maiesté se doit as-
suiettir d'entrer quelquefois en ses conseils, pour
y voir les choses qui y seront traittees, elle en au-
ra vne plus prompte & facile intelligence par le
rapport quel l'y verra de plusieurs & diuerses af-
faires & puis celuy sera vn moyen pour s'ouuir
l'esprit, & se rendre capable des choses plus gran-
des.

Ces occupations, Sire, sont dignes de vostre Ma-
iesté, & à cela i'ose la semondre de tant de plus fort,
que ie crains que l'artifice de ceux qui veulent pes-
cher dans le trouble, ne taschèt par tous efforts de
l'en diuertir, a fin de n'estre trop esclairez de son
soleil, & me semble desia que ie les entends tenir
à vostre Maiesté tels discours, comme prouenans
de prud'homie accompagnée d'amour. Hé quoy
SIRE, Que feront les hommes priuez en leur ne-
goces, si vostre Maiesté qui porte la Couronne & le
Sceptre dès la nayssances s'assuiettit au soin des af-
faires? si elle se donne ce travail d'esprit, d'en ap-

prendre l'estat & la conduite? Elle qui ne se deuroit occuper qu'en la recherche de ses passe-temps? de quoy vous seruent tant d'officiers entretenus pour cela, s'ils ne vous soulagent de ces inquietudes? Ne craignez-vous point que ce tracas altere vostre disposition? Si vous ne le faites, Sire, si font bien vos bons suiets, vostre teste sacree leur est trop importante, pour en vser ainsi à tous les iours.

C'est ainsi Sire qu'il est à craindre qu'on vueille destourner vostre Maiesté de ces occupations serieuses, pour la ranger, ou ne s'entremettre de rié du tout, ou s'occuper de choses inutiles, & friuoles, à fin d'auoir tousiours en main la direction de toutes choses & faire les Roys. Mais, Sire, comme vostre Maiesté à tousiours donné & donne encores beaucoup de esperance de soy, aussi est-il à esperer qu'elle sçaura bien repousser tels discours emmiellez, comme ennemis capitaux de la grandeur. Mais encores ne sera ce pas assez d'auoir reietté telles malices: ils en ont d'autres aussi puissantes qu'ils pourront mettre en pratique. Les plaisirs & les voluptez sont leurres aux ieunes esprits merueilleusement forts pour les attirer, & c'est en ceste part qu'il est à craindre qu'ils vous attaquent & essayent de faire par les appas, ce qu'ils n'auront peu faire par les paroles: Si vostre Maiesté ne se munit de bonne heure d'armes necessaires pour repousser des l'entrée leur violence. Car c'est ainsi qu'en ont vscé de tout temps leurs semblables, pour corrompre les plus belles ames Royallés. Ainsi en firent-ils au fils de Dion Capitaine Grec. Ainsi au fils de Zenon Empereur. Ainsi à Atalaric Roy des Gots. Et sans aller si loïn. Ainsi en ont ils fait vers aucuns de nos derniers Roys, & specialement de

Charles neufiesme, & Henry troisieme. Car s'il plaist à vostre Maiesté, de vous faire lire leurs Histoires, elle verra que les ieunes ans du premier estoient d'une merueilleuse esperance, & que les moyens dont ils se seruient pour eneruer ce grand naturel, furent les desbauches esquelles ils le plongerent comme par force, à fin que pendant qu'il s'occupoit, ou à l'amour, ou à l'effusion du sang des animaux, & en suite à celuy des hommes, ils disposassent de toutes choses à leur plaisir, & reduissent ce pauvre Estat à l'extremité, ou nous l'auons veu en son temps. Et de l'autre, quoy? Chacun sçait que l'adolscence de ce Prince estoit admirable, genereuse iusqu'à l'excez: Tesmoins tant de batailles rangees, tant de victoires par luy obtenües: Et cependant vous y verrez vn aage viril, & vn regne confit en telles voluptez (toufiours par l'artifice de ceux qui vouloient gouuerner) qu'il n'en a remporté qu'une haine publique, & en fin la reuolte de tous ses peuples.

Sire, C'est à vostre Maiesté à ce garantir de ses pieges, & à ne donner à telles gens l'honneur de vostre oreille: au contraire elle doit auoir en execration, quiconque osera luy porter telles paroles, comme indignes de l'honneur & de la Maiesté d'un Prince. Ce n'est pas à demeurer les bras croisez, à s'atiffer, à se parer, à employer tout son temps en pompes, en ieux, en balers, en dances, en mascarades, en tournois, que tant de graues Roys qui ont commandé le mesme Estat, que vostre Maiesté, se sont acquis les eloges & titres glorieux de Magnes, d'Auguste, de Saints, de Sage, de Riche, de bien aimé, de victorieux, de pere du peuple, & de grâds d'arbitres de la Chrestienté. Ce sont leurs grâ-

des & heroïques actions, Tant de guerres par eux demenees, tant de conquestes par eux faites, tant de travaux soufferts, pour donner paix à leurs peuples. Ce sont tant de belles qualitez qu'ils ont mis peine de s'aquerir par l'usage, leur foy, leur iustice, leur clemence, leur courage, leur magnanimité, leur liberalité, & tant d'autres belles parties, esquelles ils ont excellé en leur temps. Si vostre Maiesté, SIRE, veut estre avec leurs Couronnes heritieres de leur gloire, elle se doit rendre imitratice de leurs vertus, & l'usage familier des moyens dont ils se sont seruis pour s'en embellir.

La dignité à laquelle vous estes appelé, SIRE, est honorable entre toutes, mais entre toutes aussi penible & inquiète; & c'est ce qui faisoit dire à cet Ancien, que le Prince doit dormir debout: comme s'il eust voulu dire, que son repos mesme n'est pas exempt de fatigues & d'inquietudes. Et voicy vn abregé des occupations à quoy vostre charge vous oblige. (Faire iustice & iugement en ces deux mots tout est compris. Mais pour les particulariser d'auantage, Auoir en recommandation particuliere l'Eglise de Dieu, & la pureté de son seruice en icelle. Veiller sur les Pasteurs qui y sont establis. Donner ordre que iustice soit renduë à vostre peuple. Oüyr leurs plaintes sur les abus qui y sont commis. Les corriger, & chastier les coupables. Pouruoir aux affaires de l'Estat, & de la police. Rgler sa maison & despenfe d'icelle. Auoir l'œil sur ses finances, & la distribution qui s'en fait. S'instruire des affaires estrangers. En oüyr les Ambassades. Entretienir les alliances faites avec les voisins. En faire de nouuelles, s'il y escher. Poursuiure

la iustice des vsurpations faites sur les Couronnes,
 & en cas de luy se la faire foy-mesmes. Pour auoir
 aux gouuernemens des prouinces, & des places,
 & à la seureté de celles des frontieres. Establi
 aux offices & charges importantes de l'Estat, gens
 de bien & capables, qui ne portent autre marque
 sur le cœur, que la seule fleur de Lys empreinte
 Et sur toutes choses maintenir la paix entre les peu-
 ples, par l'amitié & bonne correspondance des
 vns avec les autres. Ce faisant: **SIRE**, Vostre Ma-
 jesté ne peut faillir d'estre mis au rang de ces grands
 Heros: Et bien que le dernier en ordre, si sera ce
 avec autant de gloire & d'honneur qu'aucun d'en-
 tr'eux. C'est ainsi qu'on peut euitier la gloire d'au-
 truy, Ceste emulation est digne d'une belle ame,
 & de la maison de laquelle vous estes issu. Ce-
 ste maison ne nous donna iamais que de grands
 Princes, & courageux, vos mesmes Histoires
 vous en peuuent faire foy. Ce doit estre à vostre
 Majesté vn vif aiguillon pour les imiter, & n'e-
 stre veu degenerer de leur vertu. Le Sceptre ne
 fait pas le Roy: Mais bien l'image de la Royauté,
 Tela pensé l'auoir en main, qui n'en auoit que la
 matiere: Nostre France nous en ayant fourny
 d'vns & autres. Si elle nous en a donné de grands
 & d'Augustes, elle nous en a aussi produit de ieun-
 es, de simples, de faineans. Si bien que de la com-
 paraison des vns & des autres; Vostre Majesté peut
 faire vn choix, de vie assuré & legitime. Or ce
 choix vous fera tant plus aisé à faire, qu'il n'y a
 point de proportion en leur merite, ny en l'utilité
 qui en reüssit (s'il est iuste de mesurer la valeur des
 choses par le profit qui en reuient.) Ces grands
 Princes ont formé vostre Estat, l'ont conserué

l'ont restably. Ces faineans l'ont destruiât, l'ont
 ruiné, l'ont perdu, non seulement en soy, mais
 aussi en eux, ne leur en estant resté ny tiltre ny pos-
 session. Et de cela ne se peut attribuer la cause qu'à
 leur paresse & nonchalance. Car pendant qu'ils
 s'amusoient, à des operations indignes, qu'ils
 batissoient des maisons, qu'ils dresseoient des
 compartimens en leurs iardins, qu'il se toüil-
 loient en tous delices, les Maires de leur Palais,
 leurs seruiteurs, sur qui ils se deschargioient de
 tous affaires, tant de la iustice, de la police, que
 de la guerre, prenoient tant d'autorité & de créa-
 ce dans leur Estat, que de valets ils deuindrent
 maistres. Et de vray, SIRE, C'est pitié de voir tant
 de peuple soubmis à la domination d'un seul,
 Peuples composez de grands hommes & vertu-
 eux, d'un seul vraye idole, sans sentiment, sans
 mouuement. Cela seroit-ce pas pour mener sur un
 Theatre, un Diademe sourd & muet? SIRE,
 SIRE, Que vostre Majesté ferme l'oreille aux
 chants de ces Syrennes qui la voudroient conduire
 par telles voyes? Quiconque l'osera, tenez pour
 certain qu'il a mesme dessein que les Maires anciens
 ou pour luy ou pour autrui. Mais plustost que
 vostre Majesté qui est regeton d'un si bon arbre
 traueille pour en aduancer la maturité, afin qu'à
 son temps elle en produisse les fruiâs dignes, à la
 grandeur de luy, & au bon-heur de tous ses peu-
 ples. Pourquoy, SIRE, ne le feriez-vous puisque
 le besoin en est; Et qu'en tous les degrez de vos
 occupations Royales, vous y trouuerez matiere
 tresgrande d'employ, causee par la malice de la sai-
 son? En la religion impieté, superstition, abus. Es
 Pasteurs, simonie, sacrilege, auarice & ambition,
 desbauche

desbauche, nul soing des troupeaux à eux commis. En la Iustice, corruption. Point de chastiment des coupables. Es plainctes des oppressez mespris & mocquerie. Nul soing des affaires publiques, que pour les disposer au train des passions particulieres des ministres. Vostre maison du tout desreiglee : point d'employ pour la pluspart des Officiers d'icelle, qu'autant qu'ils peuuent auoir de faueur pour se faire donner quartier.

Vos finances si mal reglees & tellement prodiguees, qu'elle ne fussent pas pour la despen-
ce des trois quarts de l'annee. Les affaires & al-
liances estrangeres si fort alterees qu'elles ne sui-
uent plus l'interest public, Mais celuy de deux
ou trois qui les gouernent. Point de poursuites
des vsurpations faictes sur vos Couronnes, au con-
traire des affections violentes d'en affermir l'ini-
uste possession au profit des vsurpateurs. Nul
soin des gouuernemens, plustost donnez aux e-
strangers incogneus, qu'à ceux qui les ont meri-
tez par leurs seruices. Les offices & charges impor-
tantes de l'Estat desniees à tous autres qu'à ceux
qui portent l'agraphe au manteau ou dans le cœur
pour marque de leur zelle. Point d'amour de la pa-
trie, ains vn travail continuel pour diuiser les sub-
iects de l'Estat, & nourrir partialité entr'eux, afin
de r'allumer le feu esteinct des guerres civiles.
Bref vn desordre par tout entretenu expressement,
pour y donner. Le moyen, SIRE, que l'estat sub-
siste dans ceste confusion ? Vous y trouuerez des
sansuës de Cour affamees du sang du pauvre peuple
à qui s'est trop peu que d'auoir tout, qui ne batis-
sent leurs maisons que de pillage. Vous y trouue-
rez vne Caterue de gens alterez, qui font les mau-

uais garçons, afin qu'on leur donne de quoy entrete-
 nir leur loif, pardons & pensions, sans autre me-
 rite & seruice prealable que de leur audace, & de
 la recommandation des Mignons de Fortune, de
 qui par ce moyen ils demeurent esclaves & crea-
 tures seruilles a vos despens. Et c'est ainsi que vo-
 stre espargne se trouue espuisee, & que le fonds de-
 stiné a la conseruation de l'Estat est diuertý. Je scay
 bien que ce rauage est exercé de l'entretènement de
 la paix, & de l'harmonie entre les subiects: Pour-
 quoy maintenir il a conuenu entrer en de grandes
 & extraordinaires despences. Et certes il en est bien
 quelque chose. Mais tout bien compté, il se trou-
 uera quelles ont plus regardé le particulier de quel-
 ques vns que le public, sans en auoir bien consi-
 deré la fin. Cependant telles ouuertures tirent a-
 pres elles des consequences plus dangereuses que
 le mal qu'on a pensé euit. Quoy? l'Estat ne peut
 il subsister sans sa ruine? Faudra-il que vostre Ma-
 jesté achete au poids de l'or la fidelité de ses sub-
 iects? Et que les contributions qu'elle tire d'une
 main de son pauvre peuple pour les necessitez pu-
 bliques soient distribuees de l'autre a aucuns parti-
 culiers d'étr'eux pour assouuir leur auarice insatia-
 ble, & leur donner plus de moien d'entretenir leurs
 desbauches & despenses folles? Faudra il point en
 fin SIRE, que vous faciez fondre vostre Couronne
 pour la leur donner? Si l'estat est assailly le deffen-
 dront ils a leurs despens? Pourquoi nos premiers
 Roys leur en ont ils donné les fiefs que pour les
 obliger a la deffence sans qu'il faille encores les cō-
 bler du nerf qui les soutient? Depuis quel tēps nos
 François sont ils deuenus mercenaires: N'auons
 nous plus de Perdicas qui pour toute recōpence de

leurs seruices se contentent de l'esperance d'Ale-
xandre : Et que fera-ce, quand l'extreme necessité
vous contraindra de leur retrancher ce qui leur a e-
sté donné? Ce Royaume Sire, est vn Royaume de
consequence. Il se trouuera plus esbranlé du re-
tranchement qu'il n'eust esté de la priuation. Ce
qui nous est donné pour vn temps, nous le posse-
dons, & en vsons cōme si c'estoit pour iamais, & sur
cela nous batissons nostre train, & nostre despen-
ce, qu'il nous est par aprestresmalaisé de reduire
au premier Estat quand ce moyen nous vient à
manquer. Le feu Roy admirable en ses maximes
en auoit introduict l'vsage ytillement, mais aussi
sagement & prudemment. Ses liberalitez estoÿent
des recompenses à la vertu & seruices de ses
speciaux seruiteurs, elles estoÿent reglees au com-
pas du merite, & octroyees sur vne grande & par-
faicte cognoissance qu'il auoit de leur valeur. D'ail-
leurs elles n'estoÿent pas si estenduës que son
Estat en peust souffrir, celles-cy au contraire le
mettent au bisac : Et sont plustost faictes à la
recommandation d'vns & autres, qu'aux seruices
que vousayent rendu ceux qui les reçoient, la
pluspart desquels ne desdaignerent iamais l'espee
que pour en faire monstre. Nostre deffunct Roy
se faisoit des creatures affidees, celle-cy le font
ceux en faueur de qui elles sont accordees, e-
strange ruse, vostre Majesté fait la despençe & vn
autre en reçoit le fruit. Et de cela, Sire, l'espreu-
ue s'en est faicte en vostre Minorité. Combien
de fois vostre Maieité (à nostre honte) s'est elle
veuë seule pendant qu'aucuns de vos seruiteurs
estoiẽt suiuis de ceste tourbe à vos gages : La li-
beralité aux Princes, Sire, est vne vertu magnani-

me pourueu qu'elle ne passe à la prodigalité, qu'elle soit mesurée à l'aune de la raison, & aye pour obiect le merite & l'vtilité. Pardonnez moy Sire, si laissant le fil de mon discours i'ay esté contrainct de m'arrester sur ce desordre, avec quelque exageration, la necessité d'un reglement m'y a poussé qui sera a vostre Maiesté vne occupation non mediocre: a laquelle neantmoins vous vous deuez resoudre, & regler ceste partie de despence a la cognoissance que vous aurez des subjects, ou a celle que le feu Roy vostre pere vous en aura donnée par ses biens faicts.

Or, Sire, vostre Maiesté aura peu voir par ce que nous auons dit, quel est le plan general de ses occupations Royales, pour ne s'asseoir point sur le boisseau. Il en faut maintenant voir les desseins particuliers, & le principal est celuy-cy: de ne passer point la balance, (c'est a dire) de ne faire violence a la Iustice: mais au contraire tenir la balance iuste, a fin qu'elle ne pâche de part ne d'autre outre son poids. Ce fut le subiect de la requeste que fit a Dieu Salomon ce sage Roy des l'entrée de son regne. Tu bailleras (celuy dict-il) a ton seruiteur vn cœur qui soit entédu a iuger ton peuple, & cognoistre le bien d'entre le mal. Car qui pourroit iuger ce tien peuple qui est en telle multitude:

Sire, vostre Majesté a plus de subiect de faire la mesme requeste a Dieu: sa charge est plus importante, son estat plus estédu, son peuple en plus grand nombre. Vous deuez aussi de tant plus vous estudier en ceste partie de vostre deuoir, afin que faisant iustice & iugement aux autres, vous soyez trouué iuste deuant sa face. C'est vne obseruation qui doit estre

emprainte dans vostre cœur, comme celle qui fait les grands Roys, qui les faict craindre, & aymer: Mais elle y doit estre veritablement: car sembler estre iuste & ue l'estre pas c'est iustice.

Vous estes donc, Sire, obligé de faire iustice à vostre peuple: & cela en deux manieres: par vous mesmes, & par le ministere de vos Officiers, des actions desquels vous n'estes pas moins responsable que des vostres propres s'il y a de la negligence de vostre part. C'est pourquoy vous devez autant qu'il se peut veiller que ceux à qui vous commettrez telles charges soyent de la qualite de ceux que Iethro conseilloit à Moyse seruiteur de Dieu de choisir pour se soulager: gens craignans Dieu, veritables, hayssants auarice: car s'ils craignent Dieu, ils exerceront leurs charges en bonne conscience, donnant ordre qu'il soit bien & dignement seruy: S'ils sont veritables, ils chercheront tousiours en toutes causes la verité & fermeront l'oreille aux impostures: & s'ils hayssent l'auarice, la corrigeant aux autres, ils se garderont de la pratiquer: soit par concutions ou autres mauuais moyens par lesquels ils peuuent attirer le bien de vos peuples.

C'est ouurage sera de tout plus digne de vostre Majesté qu'elle y trouuera de la difficulté en ce temps auquel on fait d'un Diable un Ange, & du vice vertu. Car en cette condition d'hommes aussi bien qu'en plusieurs autres se voit tant de desordre qu'il faudroit faire un monde nouveau pour restablir ce qui est peruerty. On n'y void plus que corruption, que faueur, que subtilités, que brigues, que desguisement de la verité. Pour de l'argent & des amities les iuges se rendent corrupteurs

de leurs compagnons, à la charge d'en faire autant pour eux aux occasions, & ainsi le pauvre, la veuve, l'orphelin, l'innocent, l'homme de bien se voit accablé, se voit ruiné. Las Sainte vierge fille du Ciel où estes vous ? Je cherche & ne vous trouve point, Est-ce que vous ayez quitté l'horifion de nostre France, pour habiter entre les nations Barbares, & y exercer vos liberalitez : Ou si c'est que vous soyez tellement violee, & corrompuë entre nous que vous en soyez mescognoissable ? D'où vient que vous ayez tant degeneré de vostre vertu ancienne ? Et vous ne soyez plus celle à qui toutes les nations de l'Europe, remettoyent volontiers leurs differens pour la reputation de vostre equité ? Non, non, sainte Vierge, vous estes telles que vous estiez lors, mais vous estes plus mal seruyee : Les manquements de vos exercices ne sont pas de vous : ils sont de vos Ministres, de ceux que vous honorez de vostre pourpre, a qui vous avez commis vostre poids. Vous leur criez sans cesse à voix enrouée : Faites iustice & iugemēt : N'ayez esgard à personne : Ne craignez la face de personne, car vostre iugement est le iugement de Dieu : Ne renuersez point le droit : Executez iustement ce qui est iuste. Ne faictes point iniquité. N'ayez esgard à la personne du pauvre, ny consideration à la personne du grand. En cas de contention iustifiez le iuste, & condamnez le meschant. Ne receuez la face de l'inique, & ne luy portez faueur pour faire succomber l'innocent. Mais ils ont oreilles, & n'entendent point : vos sermons leur sont des songes, vos exhortations des chimeres. Helas ! ou sera donc nostre recours : A vous, Sire, qui estes seeant sur le siege de iudicature,

affin de dissiper le mal par vostre regard. A vous principal Ministre de ceste iustice souueraine, pour en oster le meschant, affin que vostre Throsne soit fortifié par equité. Autrement Sire, ce vous seroit vne charge de conscience trop insupportable: Car il est de vostre deuoir, & de tous Princes, puis que le glauiue vous est commis, de veiller sur vos troupeaux, les deffendre d'oppression, punissant les oppresseurs, selon la grauité de leurs crimes, & tels sont punissables, de tant plus rigoureusement qu'ils doiuent seruir d'exemple aux autres de probité & de iustice, On lit que l'Empereur Alexandre Seuer, grand Prince, & iuste: ayant veu en sa Cour vn Arabinus, qui auoit le bruit d'auoir esté concussionnaire, en vne charge à luy commise, se print à s'escrier de choler. Et quoy Arabinus non seulement est encores viuant, mais aussi ose bien comparoistre au Senat en ma presence: Tesmoignage de la haine que ce bon Empereur portoit à ceux qui abusans de l'autorité de leurs charges, ne font conscience de rien pourueu qu'ils en augmentent, ou leurs maisons ou leurs amis.

Il y auoit anciennement à Rome vn certain Magistrat le plus esleué de tous, qui auoit pouuoir de corriger les mœurs des Cytoyens, changer & deposer tous Magistrats abusans de leurs charges, & autres grandes prerogatiues & auctoritez: & ce Magistrat s'appelloit Censeur. Si iamais ceste charge fut necessaire à Rome, pour maintenir en deuoir tous les Officiers de la Republique. Elle le seroit autant en nostre France: (Bien que gouuernee sous les loix d'une Monarchie.) Et feroit vostre Maiesté vne action consonante à la dignité

d'un si grand Roy, s'il la mettoit en vſage : Car encores qu'en nostre France les offices soient venaux : & qu'il semblaſt rude de depouſſer vn officier ſans le rembourſer. Si eſt-ce que les pourueuz eſtans obligez par ſerment ſolemnel à rendre iuſtice & droicteure, il ne leur ſeroit point fait de tort (s'ils y māquent) ſi auēc l'hōneur on les deſpouille encores du bien, conſiſcant leurs offices. Mais il eſt ſans doute que tels Cenſeurs, ſoient qu'ils fuſſēt officiers ou commiſſionnaires (pourueu que gens de bien, & graues perſonnages) ſeruiroient grandement pour reſtaurer le mal en bien, & redonner la vie à ceſte ſainte vertu, qui s'en va comme eſteinte & amortie : Car ceux qui ne pourroient eſtre reprimez par l'amour d'elle, le ſeroient au moins par l'apprehenſion de la peine. Nos Histoires nous font ſoy, que Charlemagne, & puis Sainct Louys, auoient vn tel ſoin, que la Juſtice fuſt adminiſtree dans leur Eſtat que ſouuent ils enuoioiēt par les prouinces des Commiſſaires, pour entendre les plaintes de leurs ſubiects, ſur ce : & leur faire iuſtice : & dit en ſuite notre meſme Histoie, que ceſt ordre qu'ils obſeruoient, auoit ſi bien eſtably toutes choſes, que ſouuēt le meſmes Commiſſaires s'en retournoient ſans trouuer de quoy corriger ny reprendre.

Mais, Sire encores ne ſera-ce pas aſſez d'auoir réglé vos officiers, à vacquer dignement en leurs charges, & faire iuſtice à tous riches & pauures, ſans acception de perſonnes, ny de qualitez. Si elle meſme ne le daigne faire és cauſes importantes, qui ne peuuent eſtre de ſa cognoiſſance excluſiuement. Car en tels cas vous la leur deuez auſſi autant qu'il ſera de voſtre ſcience & capacité.

cité. Ne desdaignant de leur donner audience, quand ils vous en requerrôt. Mais aussi prenez garde, que sous ombre d'équité vous ne luy faciez violence pour empescher l'administration & operation, comme es remissions, graces, pardons, abolitions, & autres qui sont de droit Royal, esquelles vostre Majesté doit estre fort retenuë, pour ne les oëtroier sans grãde cognoissance de cause: Autrement ceste belle vertu se tourneroit en vice. Car c'est autãt de cruauté de ne punir les mal-faïcteurs, que de faire outrage aux innocens, & Dieu qui voit toutes choses, ne laisse d'en prãdre la vengeance, souvent & sur les coupables, & sur ceux qui les ont tollerez. C'est ce qui faisoit dire à Platon: Que Dieu tenant le cõmẽcement, le milieu & la fin du mõiẽde, se pourmeue par la nature, faisant vne ligne droite, & qu'avec luy marche la iustice vengeresse de ce qui a esté cõmis & forfait contre la Loy diuine, pour monstrier que quelque conuenance que l'homme y apporte, Dieu la fait en son temps, & ainsi qu'il a ordonnẽ.

D'auantage, S I R E, Il est encores du deuoir de vostre Majesté, de receuoir les doleãces de vos pauvres sujets, sur les actions, rapines, & violences, tant de vostre Noblesse, que de vos Officiers. Car la voix de l'oppressé crie deuant Dieu, & telle voix l'esmeur à cholere, contre ceux qui ne la veulent escouter, & luy font la sourde oreille. Le bon Prince est le recours du miserable & du delaisé: pour en rẽporter le tiltre veritable, assujẽctisez vous y S I R E, à l'imitation de vos Ancestres, pour les passer encores, ou pour le moins les seconder en ceste action. Nous auons des exemples notables du soin qu'ils ont eũ, & de leur diligence en ceste partie, & entre autres vn de Philippes Auguste, à l'encõtre de Gny,

Compte d'Auvergne. Ce Guy, ayant exigé de ses
suijets avec plusieurs excez, & violences des som-
mes grandes & immenses de deniers, dont plaintes
reiterees luy furent par eux faictes, & l'ayant trouué
coupable du faict, il le condâna par l'aduis des Ba-
rons de France, a perdre sa terre & seigneurie d'Au-
vergne, laquelle de lors fut reünie a la Couronne.
C'est ainsi que les grands Roys se rendent venera-
bles. Ainsi qu'il se font aimer de leurs peuples, qu'ils
sont craints, qu'ils sont redoutez, des grands, des pe-
tits, & qu'ils establisent fermement leur autorité,
& voila quand aux particuliers.

Or si vostre Majeste est abstraincte à ce deuoir
enuers chacun particulier de ses peuples. Je vous
laisse à penser qu'elle peut estre enuers le general.
Estant leur Roy vous estes leur pere commun, &
eux tous vos enfans obligé donc de les aimer egal-
lement, & procurer entr'eux vnion, & reconcorde les
maintenir en paix, les faisant iouyr de mesmes &
semblables priuileges, & prerogatiues les vns que
les autres, comme les vrais, bons & naturels suijets,
les honorant tous indifferemment des charges ho-
norables de son Estat sans autre difference que de
leurs fidelitez & capacitez. C'est iustice que ceux
qui contribuent aux deuoirs deus au Prince, & à
l'Estat iouissent aussi du bien de l'Estat, & des fa-
ueurs du Prince.

Il y a encores vn autre deuoir public de Iustice, à
quoy la Majeste du Roy est obligee, qui consiste és
Edicts & reglemens generaux, lesquels vostre Maje-
ste est tenuë d'auoir l'œil sur le droict de l'autrui
pour ne commander chose qui puisse tourner a son
dōmage avec iniustice. Car la iustice est la fin de la
Loy, & la Loy œuvre du Prince qui luy empraint

l'image de Dieu, & c'est par la que principalement les Roys le representent, & pourquoy l'Escripture les appelle Dieux? en cela qu'il veut estre imité d'eux, non pas à foudroier, & ruiner, à destruire.

Mais comme ils ne peuuent estre vniuersels en tous affaires, aussi leur aduient il quelquefois de commander des choses escartees de la iustice, & du deuoir. C'est pourquoy vostre Maiesté deura recevoir benignement les remonstrances qui sur ce, luy pourront estre faites par ces officiers, & bons seruiteurs, poiser leur raisons, & se soubmettre librement à ce qui sera trouué iuste & raisonnable. Ainsi ne commandant que choses legitimes, elle se pourra asseurer d'estre aymee & obeve.

Mais Sire, s'il est raisonnable que vostre Majesté s'occupe a rendre Iustice à ses subjects, il est tresiuste qu'elle traualle à cela faire à soy-mesmes: Et ceste iustice est de deux sortes, l'une qui le regarde en l'obeissance à luy deuë; Et de l'autre le feu Roy son pere au chastiment exemplaire du paricide & assassinat abominable commis en sa personne: Et bien que ces deux membres de iustice semblent plus particuliers à vostre Majesté: si est-ce que le public y est grandement interessé, qui fait qu'elle si doit aussi employer avec plus de zelle.

Le premier, tire avec soy vne consequence necessaire, que si le Prince est obligé de maintenir son peuple en paix, & luy faire iustice: La mesme obligation, est au suiet d'aimer son Prince, & luy obeir. C'est pourquoy vostre Majesté ayant son autorité fondee sur ceste Baze, elle se doit efforcer de la luy maintenir en sorte qu'es choses iustes, rien n'empesche l'execution de ses volontez.

Or il y a deux moyens, par lesquels vostre Ma-

jesté pourroit estre empeschée, l'un sous couleur de iustice, l'autre par la rebellion de vos peuples. Celuy-la, sous pretexte de vostre autorité. Celuy-cy contre tous deux, neantmoins à vostre preiudice.

SIRE, pour certaines grâdes raisons, les Roys vos predecesseurs ont estably en plusieurs provinces de vostre Estat, des Iuges souverains qui ont la cognoissance, & iugent diffinitiuement de tous affaires, qui sont de leur iurisdiction, dans leur ressort, sans le consentement desquels vos Edicts ne peuvent estre executez: si bien qu'il arriue quelquesfois que par l'opiniaistreté & ialousie des officiers, vos plus iustes Edicts & Arrests ne peuvent passer, & demeurent sans le pouuoit executer. De sorte que souuent on les voit suyuis en vne province, & en l'autre nō: Comme si vostre autorité ne deuoit pas estre vne, & en mesme consideration par tout. Vostre Majesté doit à cela trouuer quelques expediēs, afin qu'elle soit obeye generalement par toutes les provinces de son Estat, & aussi bien à Thoulouse, qu'à Paris, & ainsi és autres: Je dis pour les affaires d'importance, & qui regardent le general: car il est sans doute que ceste bigarure altere bien fort le repos public. Et de ceste nature sont les Edits de pacification, les reglemens generaux, la cognoissance des crimes au premier chef. En telles choses & autres semblables, vostre Majesté doit procurer, que iustice luy soit renduë par les officiers: Et si i'estois capable de conseil, tel genre d'affaires s'executeroit par tout estans passees & verifiees en vostre Parlement de Paris (comme estant le vray Parlement de France) sans attendre d'ailleurs autre consentement ny verification. D'autant que la retardation de telles affaires importe quelquefois tant au public qu'il

court fortune d'en receuoir trouble. Nous l'auons
 experimenté en nosiours, en deux ou trois choses
 generaux, & de mesme merite par tout que neant-
 moins par leur execution causent mil importunitéz
 à vostre Majesté, & nous font reuoir en nos villes
 les tristes subjects de nostre malheur. Ou bien vostre
 Maiesté pourroit faire reductiō de tous lesdits Par-
 lemens en vn seul, sous le titre de Parlement de
 France, dont le siege principal seroit en vostre ville
 de Paris, auquel tous les susdits affaires generaux &
 autres Edicts seroient iugez, & neantmoins pour la
 commodité des prouinces esloignees, les officiers
 souuerains, qui y sont establis y seroient continuez
 aux mesmes droicts qu'ils ont à present, sous ledit
 titre de Parlement de France, en la Chambre du
 lieu, ou ils sont à present ordonnez. Par ce moyen
 le public seroit seruy avec autāt de commodité, vo-
 stre Maiesté avec plus de Iustice & d'obeissance, &
 lesdits officiers seruiroient avec plus d'honneur,
 estans du corps de cest vnique & souuerain Parle-
 ment. Outre ce que seroit reunir avec plus de fer-
 meté les prouinces à vn seul corps & ramener les
 choses à leur principe. Or comme l'establissement
 de ces Parlemens s'est fait à diuers temps, par au-
 cuns de vos predecesseurs, pour la necessité des af-
 faires de leurs regnes, & affermir de tant plus sous
 leur autorité les prouinces de leurs ressorts frai-
 chement reunies: Aussi seroit-il du pouuoir de vo-
 stre Majesté, si elle trouue en ceste continuation de
 l'interest à son seruice, comme il peut bien estre
 que mesme chose soit vtile en vn temps, & nuisible
 en l'autre, d'en changer l'ordre: Car l'on ne doit auoir
 en l'Estat autre but que sa conseruation & son
 repos: Pour lequel establir l'on peut vser des moyes

que l'occasion met en main.

L'autre moyen par lequel l'autorité de vostre Maïeste, pourroit estre empeschée est la rebellion de vos peuples, & celuy cy comme il est fort dangereux: aussi vostre Maïesté y doit-elle user de prudence, & auparavant que de rien entreprendre, poiser les suiets pour ne rien faire mal à propos. Car bien que vostre Maïesté ait pouuoir absolu dans son Estat, & qu'il dōne la loy telle qu'il veut à son peuple: Si est-ce que les bons Princes s'assuiettissent à l'entretienement de ceste mesme loy qu'ils donnent. Si bien, S I R E, qu'en ces occurances: Il vous faut considerer la cause & le motif de leur desbauche: Car si elle est fondée sur la iustice de vos Edicts & Reglemens, vous devez les corrigeant doucement les ramener à leur deuoir, & ordonner leur chastiment, non tant pour la cause que pour l'attract, (n'estant permis au suiet pour quelque cause que ce soit, se souleuer contre le Prince;) Mais si le pretexte de leur reuolte n'a point d'autre fondement qu'en leur mauuaise humeur. En ce cas elle les doit reduire à toutes sortes de deuoirs & soubmissions, les chastians & leurs chefs, selon l'exigence des cas, pour seruir d'exemple à la posterité. Mais à tout cela les saisons y sont considerables & se doit regler le Prince selon l'Estat des choses avec prudence & circonspection. Et voilà, S I R E, quand à la iustice qui est deuë à vostre personne: voyons maintenant celle qui vous est deuë, en la personne du feu Roy vostre Pere:

S I R E, vostre Maïesté est obligée par toutes sortes de deuoirs de s'en faire faire, la nature vous y conuie, comme fils, & encores comme fils bien-aimé vous le devez à l'amour d'un si bon pere, &

aux travaux qu'il a soufferts pour vous laisser cest
Estat florissant, en repos en biens en multitude de
peuples : vous le devez à vos subiects, pour l'inté-
rest qu'ils ont en la perte d'un si bon Roy, d'un grand
Prince, ornement de l'Estat, son restaurateur son
défenseur. Jusque icy le seul bras, qui luy a porté le
coup funeste a esté châtié : Mais c'est vne trop mai-
gre victime pour un si grand péché. Ce n'est pas
assez si la teste & les autres membres qui y ont con-
tribué demeurent impunis. Il est de vostre deuoir,
SIRE, d'en rechercher les causes & les motifs, les
punir exemplairement, sans acception des person-
nes ny des qualitez. Cest œuvre sera digne d'un bon
fils, & d'un bon Roy, les fruits duquel ne se gou-
steront pas seulement en ce temps : Mais encore à
l'aduenir par l'exemple. Et a cela vous vous devez
employer extraordinairement : D'autant qu'il sem-
ble que cest abominable crime s'aille tourner entre
nous en coustume, & que d'oresnauant le meurtre
& assassinat de nos Rois, ne soit pas un oser plus
hazardoux que celui d'un homme priué. Ceste cau-
se vous est commune avec les autres Princes qui
vous doit de tant plus semondre, de ne donner repos
à vostre esprit, que les Autheurs de cest attentat ne
soient descouverts, la chose vous sera aisée & facile,
si vous y procédez courageusement les indices en
sont tresgrands, la voix publique est la voix de Dieu.
Que vostre Maiesté decerne les commissions à gens
de bien & sages, qui n'ayent point d'esgard à l'appar-
tance des personnes pour informer du fait qu'ils y
remarquent les circonstances, oyent les depositions
qui y seront faites, examinent celles qui l'ont desia
esté : Si vous le faites ainsi, ne doutez pas que Dieu
qui est Roy prenant la cause des Rois en sa main,

ne face voir au iour la verité toute nuë, d'un si mes-
chant & abominable crime au bien de vostre Estat,
& à la seureté de vostre personne sacrée. Les Do-
cteurs en sont assez cogneuz en vostre France, &
pleust à Dieu qu'ils ne les fussent pastant: Auât leur
venuë la France ne produisoit point de tels mōstres.
Pres de douze cens ans se sont passez en cest Estat,
sans que l'on sçeuſt que c'estoit que de parricide: il
nous l'ont appris en cinquante ans & tellement ap-
pris que cest apprentissage nous a rauy deux de nos
Roys de suite.

Grande pitié, S I R E, que nous ayons veu tout ce
mal de nos yeux, & qu'encores il semble que nous
trauailions avec peine, pour engraisser ces oyseaux
funestes, & que nous voulions cōme leur passer la
main dessus, pour les appriuoiser. O qu'il seroit biē
plus expedient de les effaroucher en sorte: qu'il leur
print enuie de quitter nos contrees, & s'en retour-
ner d'où ils sont venus: Les sacrees personnes de
nos Roys nous seroient plus asseurees, nous viurions
plus en repos sous leur domination, & n'aurions le
desplaisir de voir deuant nos yeux les meschans, qui
font gloire de nous raurir par le meurtre de nos Prin-
ces, leur amour & bien-veillance.

S I R E, Le feu Roy vostre pere, tres. grand Prin-
ce au reste, par sa clemence excessiue, & ses bien-
faits, auoit pensé se concilier l'amour & fidelité
de ses imposteurs, ou pour le moins diuertir leur
rage. Il pensoit (ce bō Prince) que ces caresses & au-
tres resmoignages de bonne volonté en leur en-
droit, luy seruiroient de bouclier contre leurs cou-
reux, d'antidote à leurs poisons, & ne s'aduisoit pas
cependant qu'il mettoit sans y penser le glaiue en
la main de ses ennemis, dont ils le deuoient esgor-

ger : que leur donnant l'approche de sa personne : leur donnoit par mesme moyen plus de commodité de luy raur ce qu'il vouloit conseruer. Toutes les autres actions de ce Prince vous doiuent seruir de patron pour la conduite des vostres. Celle cy toute seule doit estre esuitee de vostre Maiesté, si elle aime la conseruation : Ce sont espies en vostre Estat, qui par leur impudence & hypocrisie, furentent les maisons, & les consciences, pour bastir sur icelles ce qu'ils iugēt seruir a la grādeur de ceux qui les mettrēt en besongne : n'espargnāt pas mesmes celles de nos Roys : Telsmoing celle du feu Roy vostre pere, leur biéfacteur : Et de cela, Sire, il y vous en peut souuenir.

Gardez-vous, Sire, de telles gens, ceste profonde humilité, ces reuerences basses sōt des appats pour gagner creāce, afin de paruenir a leurs desseins : mais si vostre Majesté vouloit faire chose digne d'elle, & se mettre a couuert de leurs attentats, elle feroit de point en point executer les arrests, donnez contre eux & banniroit entierement de tout son Estat, ceste peste, celle contagion, qui a tant corrompu les peuples.

Vostre Majesté, Sire, Outre les causes cy dessus qui sont tresgrandes, qui importent a vostre personne & a vostre Estat, est a ce conuice, par les exemples de tant d'Estats voisins, mesmes de l'Italie, qui n'ont trouué repos qu'en l'esloignement de telles gens par des Edicts si authentiques qu'ils declarent anathemes ceux qui oseront proposer leur reſtablishement. Pourquoi, Sire, seriez vous plus inuite qu'eux, en les supportant ? Est-ce que vostre Couronne ne peut subsister sans leur entremise ? Ne scauez vous pas qu'ils ont traouillé autant qu'ils ont peu pour le vous arracher en la persone du feu Roy.

Et qu'ils le font encores tous les iours en la vostre ,
par leurs esprits ?

Sire , il est tresdangereux de tollerer dans vostre
Estat vn si grand nombre de personnes qui ne se di-
sent poinct vos subiects, qui ont vœu d'obeissance
aueuglée a autre Prince que vous, qui sont obligez
par ce vœu si estroictemēt qu'il ne leur est pas mes-
me permis de demander raison de ce qui leur est
enioint. Si bien que si ce Prince, est ennemy de vo-
stre Maieſté comme elle n'a pas lettres d'vne amitié
perpetuelle avec luy, se pouuant rencontrer en ce
ſiege, des Bonifaces, des Iulles, des Leons, des Six-
tes, ſont-ce pas autant d'ennemis iurez qu'ils ſont
des personnes de vostre Estat de tant plus dange-
reux qu'ils ſont ennemis couerts ? Sire , ſi vous at-
tendez de leurs maiſtres le conſeil de leur banniſſe-
ment, vous eſtes taillé de les auoir pour iamais : Ils
leur ſont ſeruiteurs trop fidelles , & trop vtiles, par
leur moyen, ils ſçauent toutes choſes , & diſpoſent
de tuotes choſes pour le bien de leur grandeur &
domination.

Non, non, Sire, C'eſt a vostre Maieſté a ordonner
ce qui eſt neceſſaire pour la conduicte de vostre Es-
tat: elle le doit ſans attēdre l'aduiſ d'aucun: ces ſcru-
pules eſtoient bons le temps paſſé, que l'ignorance
portoit nos peres a tout ſouffrir. A preſent que les
droicts de tous ſont ſi clairement liquidez, il en faut
vſer iuſtement & reprendre ce que nous auons laiſ-
ſé vſurper. Ainſi ferez vous iuſtice a vous meſmes :
Ainſi la memoire de feu noſtre grand Roy: Ainſi a
tous vos peuples en general: A vous meſmes d'au-
tant que vous aſſeurez vostre perſonne, & vostre
Eſtat. Au feu Roy pour ce que leur meſchante do-
ctrine la meurtry. A vos peuples, d'autant qu'ils au-

ront plus de moyē de conseruer leurs Princes, iouyr de leur amour, & bien-veillance & ce garentir de l'infection que telles gens versent parmy eux.

Or Sire, si vostre Maiesté reçoit de l'honneur en l'exercice de ce second commandement de nostre Philosophe elle n'en receura pas moins en la consideration du troisieme. Celuy-la cōsiste à faire droict à tous, & celuy cy à iuger prudemment des choses, examiner les occurrāces & sur icelles, bastir l'utile, & l'honorable, l'vn tient la balance equitable, & l'autre iuge du poix. Et c'est ce qu'il vouloit dire quand il exorte de ne toucher en la main de tous, icy la prudence fait ces operations, comme celle qui poise la valeur & le merite des choses presentes par la consideration des passees.

Sire, ne touchez pas en la main de tous: Ne contractez pas amitié avec tous; l'amitié est vne generation qui se fait par conformité & similitude: C'est pourquoy il vous faut prendre garde que celle que vous voudrez lier soit avec suiets correspondants au merite de la vostre, estāt impossible qu'une amitié se puisse bien nouer entre personnes de mœurs differentes, & façon de viure. tēdantes a autres fins. Les accords de la musique ont bien leur consonance par cōtrarieté de sons: Mais en ceste consonāce, & armonie de l'amitié, il n'y doit auoir du tout rien de dissemblable, ny d'inegal, ny de couuert, & obscur, ains doit estre composee de toutes choses pareilles, de mesme volonté mesme opinion, mesme conseil, & toute mesme affection, comme si ce n'estoit qu'une seule ame despartye, & distribuee en plusieurs corps.

Or telles amitez ne se peuuent contracter qu'en vne longue suite d'annees, estant malaisé d'en re-

cognoistre promptement les sujets: Car il ne suffit pas d'y remarquer les apparences externes, il y faut examiner & sonder les cœurs. Celles qui se contractent par vne cognoissance parfaite des sujets est de plus longue tenue. Et comme ce peintre respondit a quelqu'un qui le blasmoit, du temps qu'il employoit en ses peintures qu'a la verité il estoit longtemps a peindre: mais aussi que c'estoit pour longtemps. De mesme celuy garde vne amitié longuement qui employe beaucoup de temps a l'espreuue.

Sire, en toute amitié parfaite, il y a trois choses a considerer, la vertu, comme honeste, la conuersation comme plaisante, & l'vtilité comme necessaire: Sans ces trois conditions elle est manquée, & vostre Majesté en ceste éminence d'honneur & de puissance, où elle est appelée, les y doit désirer aussi bien que les autres hommes, pour iouir aussi des fruits qu'elle produit. Or telles amitez sont de deux sortes, les vnes a contracter avec vos propres sujets, & les autres avec les estrangers: és vnes & és autres comme il y a du profit a les contracter avec personnes vertueuses: aussi il y a du hazard au contraire. C'est pourquoy vostre M. auparavant que d'en venir là, doit examiner diligemment les sujets, pour ne semer en terre ingrate, & bien que celles que vous auez a nouer avec aucuns de vos sujets, soyent toutes inegales pour les personnes, & que toute l'obligation soit en vne part, Si est ce qu'il s'y trouue partie en quelque sorte, par leur amour & fidelité, laquelle n'est pas moins vtile aux Princes qu'aux sujets sa bien-veillance & ses faueurs.

Or, SIRE, entre ceux de vos sujets, a qui vous deuez donner la main plus raisonnablement & vtilement vous le deuez a vos Princes, aux Princes de

vostre sãg: (Car en nostre Frãce, tous autres qu'eux
 soit exclus de ceste qualité.) De tant plus, SIRE,
 qu'ils sont de vostre tige, de mēme maison que
 vous, capables de vo^r succeder, que l'interest qu'ils
 ont à l'augmentatiō de vostre grandeur les oblige a
 y cōtribuer de leur soin & vigilance, & que par na-
 ture il doit auoir entre vous cōformité d'affectiōs
 rēdantes à mēmes fins. Car où peuent-ils recevoir
 plus de bien plus d'honneur, plus de grandeur: S'ils
 sont hommes ils doiuent estre contans de ces con-
 ditions: puis qu'en icelles cōsiste tout ce qui se peut
 esouhaitter d'excellence mōdaine. Ils ne sont iamais
 plus grands que pres de vous: leur lustre despend de
 celuy que vous leurs donnez: ils n'ōr de l'éclat que
 par la reflexion du vostre. Que peuent-ils donc
 esperer de mieux? Ces considérations, SIRE, vous
 doiuent seruir de preuue tres asseurée de leur affe-
 ctiōs, & fidelitez; puis que toutes choses les y obli-
 gent La Nature, l'honneur & leur bien propre. A
 eux donc, SIRE, donnez la main asseuremēt: faictes
 leur part de vos secrets: communiquez avec eux fa-
 milieremēt & leur resmoignez par toutes sortes de
 demōstrations externes la certitude que vous auez
 de leur amour, de ceste procedure vous ne viēdrez
 point au repentir: au contraire ce resmoignage de
 confiance leur sera vn esguillon pressant pour vous
 cōtinuer leurs fidelitez & se rēdre de tant plus ass-
 dus au seruice de vostre Estat, & cetter bōne corres-
 pondance, vous est vn soulagemēt extreme à vostre
 M. & vn moyē vtile pour vous descharger de partie
 du faix que vous auez à porter en ceste administra-
 tion. On ne list point qu'aucun de vos predeces-
 seurs se soit mal trouuē de cest vsage, si ont ils bien
 de l'opposé. Ces personnes esleuees estant si aloq-

ses de leurs qualitez qu'elles en souffrent mal-aisément le mespris, & portēt avec impatience d'estre veuz en l'Estat comme pieces de rebut, qui ne seruent que de monstre. Et a la verité, Sire, il n'est pas iuste, on doit faire estat des choses selon leur merite, & des hommes selon les vertus & les qualitez qui les honorēt. Ceux-cy estans naiz tels que nuls autres ne les peuēt esgaller. Il est aussi bien raisonnable qu'ils soient traictez de mesmes & qu'ils ayēt telle part au gouuernement de l'Estat que le rang qu'ilstienent le peut requerir. Je me souuiens a ce subiect d'auoir leu que Charles de Bourbon (ce grand Conestable qui a tant cousté a la France) auoit fort souuent en la bouche l'apophtegme d'un Gétil-homme Gascon lequel enquis du Roy Charles septiesme qu'elle chose le pourroit induire a luy rompre la foy dont il auoit fait preuue en tant d'importās affaires. Je n'espererois luy respondre il y eustre attiré par vostre Royaume, ny pour l'Empire de la terre, mais pour vne outrage fait a mon honneur, vn mespris, Sire, m'y porteroit. Et certes ce Prince fit bien voir a la France (bien qu'à ses despens) combien le mespris touchel'auis d'un Prince courageux & a quel desespoir il le reduit. Ceux qui viuent sont de mesme étoffe que luy, qui vous doit faire prendre garde, Sire, de ne les renger a mesme extremité, afin de ne reduire vostre Estat aux mesmes accessoiresson il s'est veu en son temps. Vostre Frâce Sire, se resent encores & se resentira, à iamais de tels vsages, elle y a perdu son sang, ses Estats, ses biens, elle y a veu l'un de ses braues Princes captifs sous la misericorde de son ennemy capital, reduit a telle extremité de luy desposer ses propres enfans pour gage. De luy quitter son bien le-

gitime, son patrimoine, le bien à luy laissé de ses peres. Et pourquoy, Sire, voudriez vous encourir mesme fortune. Il est iuste, Sire, & tres-iuste que vostre Majesté soit obeye que son nom soit reclamé sur tous ses peuples, & que vos Princes aussi bien que vos autres suiectz se soubmettent à la loy que vous leur voudrez imposer : Mais aussi vostre Maiesté doit vser prudemment de ce pouuoir & ne le pratiquer pas à toutes occurâces: car comme elle est appelée à vne charge de pere aussi doit elle quelquesfois supporter les infirmittez de ses enfans de ses premiers naiz, lors principalement qu'ils n'ont pour obiect que la iustice le bien de l'Estat & la conseruation du rang deub à leur dignité. Auez vous quelque aduantage à servir des Ministres aux passions de vos seruiteurs, & estâcher leur soif ardante d'âbition, & d'auarice: Ne voyez vous pas que ces violences ne tendent qu'à donner, & se cōseruer ceste tyrannie qu'ils ont vsurpée dans vostre Minorité? Et qu'ils ne se seruent de la bonté & facilité de la Royne vostre mere que pour couuerture à leur conuoitise, & domination? Sire, Sire, à trop presser l'enguille on la pert, il y a cinquante ans que si mesmes choses fussent aduenues vostre Estat seroit desia ruyné, & vous deuez cela à la fidelité de vos peuples: Mais aussi de se doit elle tenter. Pensez vous Sire, qu'elle ne soit tastee, qu'elle ne soit sondée? Et qu'il n'y ait plus de Princes voisins capables de ce faire? N'ëvoyez vous pas vn genereux & mutin tout prest les armes en la main qui ne cherche depuis long temps que les occasions de se vanger du tort qu'il estime luy estre fait és alliances contractees avec l'Espagne à son preiudice? qui sçait s'il n'y a point d'autres ressors? Et que seroit-ce

si ces Princes mescontents luy prestoient l'espaule? Bien qu'ils soyent debiles pour causer au corps de l'Estat vne fièvre violente, si peuuent ils luy donner del'emotion, Sire, euitiez ce desordre, & travaillez desormais, non à contéter l'humeur de vos Ministres: Mais celle de la plus saine & entiere partie de vos sniects qui ne laissent dans ce vœu sainct & irreuocable de fidelité qu'ils vous ont fait, de soupirer sous la rigueur de leur domination, De plaindre la rude cōdition de vos Princes, & de preuoir à ceste occasion quelque defastre dans vostre Estat, si vostre Maiesté par vn meilleur ordre ne met peine del'en diuertir.

Voila Sire, les premiers & principaux sniets à qui vous deuez donner la main: mais ce n'est pas encores assez. Telles personnes ne sont pas a tous vsages, elles sont bonnes pour commander aux autres, & pour les affaires importantes de l'estat: il vous en faut de plus mediocres pour les seconder, & pour ses exercices ordinaires: & ceux la il vous les faut prendre au choix, & aduiser de n'y receuoir que ceux de qui la probité vous sera cogneuë, ou par vostre experiēce propre, ou que les seruices pareux rendus au feu Roy, vostre pere, vous en seruent de preuue asseuree. Car leur obligation n'ayât pour obiect autre interest particulier que le naturel du sniect enuers son Prince, il n'arriue pas tousiours qu'on y face rencontre telle qu'on se la propose, quelquefois sous la face d'un prudhōme on y trouue vn hypocrite, d'un parfait amy, vn flatteur, d'un franc seruiteur vn traistre.

Le choix que vous ferez, Sire, doit encore estre de deux genres d'hommes, les vns pour estre amis du Roy, (c'est à dire) de vostre Estat. Les autres
d'Alexan-

dire (c'est à dire) de vostre personne, Les vns pour les affaires, les autres pour passetemps: Le bon choix des vns & des autres, toutesfois également necessaire, & leur probité & fidelité également requise. Car si le general de vostre Estata besoin de bonne conduite, vostre personne n'en à pas moins, & peut estre d'auantage C'est pourquoy vous deuez prendre garde de n'y admettre que gens qui ne puissent corrompre vostre bõ naturel, par l'accez que vous leur donnez pres de vous, & pour ce qu'il est naturel à tous hommes, d'aymer la frequentation de ceux qui les approchent d'aage: Et neantmoins qu'il y a du danger es ieunes amitez. V. M. doit en l'eslection qu'elle en pourra faire, voire de choisir ceux qui seront le moins portéz aux desbauches, esquelles les ieunes Seigneurs se laissent aysement conduire: mais les prendre d'une nature douce & paisible, afin de s'esmouuoir au bien par ses exemples ordinaires & familiers: Et tels ieunes Seigneurs seront pour accompagner v. M. en tous honnestes passe temps & exercices: Car pour le conseil & les affaires elle les doit prendre de ceux: à qui l'aage meur a donné de l'experience aux affaires du monde. Les conseils des ieunes poutàs estre manquez en beaucoup de choses faute de prudence, qui ne se peut acquerir que par vne longue pratique & negotiation: L'vsage des ieunes conseils fit perdre à Roboã, fils de Salomon, la plus grande partie de son Royaume, les boüillons de la ieunesse emportans quelquefois les hommes à des entreprises mal digerées, dont les Estats se trouuent esbranlez. Il vous faut donc Sire, donner la main à ces deux genres d'hommes, & pour ces deux diuerses fins à quelques anciẽs preud'hommes pour le conseil & les affaires, & à quelques Seigneurs bien moriginez, pour compagnons de vos

exercices: Et ainsi en l'une & en l'autre V. M. sera servie avec plaisir & contentement, & vostre Estat avec utilité & honneur. Et voila, Sire, comme quoy & avec qui de vos sujets vous pourrez donner la main utilement, Il reste a voir comme vous le pourrez faire aux Estrangers, & a quels d'entr'eux: & bien que celuy-cy ne soit pas si important que l'autre: si est-ce qu'il est utile, s'il est fait avec prudence & quand ie dis cela, ie dis tout

Pour le bien faire, Sire, il vous y faut considerer trois choses que l'honneur de vous & de V. Couronne, n'y reçoive point d'intérest, que vous ayez une parfaite cognoissance de l'amitié de ceux que vous en voudrez honorer, & que vostre Estat en reçoive utilité particuliere. Si vous le faites sans intérest de l'honneur, il y aura égalité es avantages: si avec certitude d'amitié, il n'y aura rien de dissemblable, rien de couvert & obscur, il y aura sincerité d'affection avec iustice si avec l'utilité publique, il y aura paix & amour entre les peuples, & égal profit & utilité en la communication.

Or, Sire, ie dis donc que pour donner la main aux estrangers, & contracter alliâces avec eux. Ces choses sont si considerables que sans icelles elles ne peuvent subsister. La fin de telles amitez & confederations, devant estre la paix & le repos public, lequel ne peut estre maintenu, sans qu'entre les contractâs la bille soit pareille en toutes sortes, au moins avec autât de proportion que les sujets le peuvent porter.

Sire. Ce grand Estat sur lequel V. M. commande passe en ancienneté tous les Royaumes du monde. Ce grand aage luy a donné l'experience de plusieurs choses necessaires, pour la conservation de son estre & de sa M. Il a fait espreuve de plusieurs & diuerses amitez, selon que le temps & ses affaires, luy en ont

offert l'occasion. De ces vieilles amitez il luy en reste encores d'entiers, Et celles-là, Sire, me semblent d'autant plus asseurees, que leurs fondemens sont assis sur la conformité des humeurs & naturels des peuples, qui me feroit cōseiller à V. M. de les entretenir avec soin & diligence. Il y en a aussi qui ne sont pas si anciennes, & si bien qu'elles ayent esté entées dans le trouble, si est ce que la vicissitude des affaires du monde en a affermi le bastiment en sorte qu'il ne peut menacer ruine au dommage des vns, ny des autres. En ces deux especes d'alliance, nous auons ou l'amitié ancienne des peuples ou la nature pour ciment de leur fermeté. Nous sommes alliez avec les Allemans comme nos freres germains : avec les Flamans comme ayant esté du corps de nostre Estat, & partant liez d'amitié naturelle : nous le sōmes avec les Suisses, comme nos comperes, & bons amis reconnus pour tels. Nous le sommes des Anglois, & bien que naturels differēds, & cōtrarieté d'humeurs. Si est ce que nostre France estant reünie come elle est, & ramassée en vn seul corps, ils ne nous peuvent porter dommage, par ceste grande separation que Dieu y a mise : S'ils l'ont faict autrefois, c'estoit sous la faueur de belles Prouinces & du nombre de ports qu'ils possedoient dans nostre Estat ? Mais à present, que V. M. seule y est reuersee, cette apprehension ne nous doit toucher. Nous en auons avec les potēras d'Italie, Mais les bornes d'entre nous & eux sont si fortes, & les Estats en si grand nombre, & si petits au regard du nostre que nous n'auons subiect d'en craindre l'abord. Outre que Dieu mercy toutes choses sōt égales entre nous, quand aux droicts chacun se maintenant dans le sien, sans auoir rien de l'autrui. Si bien que de telles alliances vostre Estat n'ē peut sinon receuoir beaucoup d'utilité, au

moins point de dōmage. Il ne reste plus a parler que de celle que nous auons avec l'Espaigne, & de celle la j'auray adiscourir plus amplement pour l'occasion qui s'en presente es alliances du mariage que V. M. est sur le poinct de contracter avec elle, la suppliant tres-humblement de me pardonner si ie suis cōtraint pour luy représenter la verité d'vser de quelque liberté en parolles plus grandes que ie ne ferois en autre subiect moins important: Mais celuy-cy estant de qualité chacun scait aussi qu'il a besoing d'estre exagéré selon son merite.

SIRE, si vostre M. reçoit honneur de telles alliances, si elle est asseuree de l'amitié parfaicte du Roy d'Espaigne, si vos subiects y reçoient de la cōmodité, Vous deuez, Sire, sans autre conseil paracheuer ce qui est cōmence, le terminer & mettre a fin, Mais si l'honneur de V. M. y est interessé, s'il n'y a poinct en luy d'affections pour vous, si vos subiects en peuvent estre incommodez, V. M. ne doit passer oultre, ains doit casser & annuller ce qui a esté fait & restablir toutes choses comme au parauant. Or qu'en telles alliances l'honneur de V. M. reçoie vne atteinte, que ce Prince ne soit porté d'aucune bonne volonté pour vous, que vos peuples n'y reçoient profit quelconque V. M. Sire, le pourra voir si elle préd la peine de bien considerer ce qui luy en sera dict.

Sire, si vostre Maiesté veut toucher en la main de ce Prince, & contracter amitié & alliance avec luy sans l'interest de son honneur & de celui de son Estat toutes choses doiuent estre égales entre vous, esgales ez personnes esgales ez conditions, & ez aduātages Chacun de vous doit faire raison a son amy & luy faire iustice, sans reserve, sans clause, ny restriction quelconque; Pour les personnes, il se trouue quelque esgalité entre vous, En ce que tous

yffus de maisons Royales, & des premiers du monde, mais elle n'est entiere pourtant en ce que la Princesse la fille dès l'entree de ceste alliance porte le tiltre & qualité de Roïne, Ou Madame vostre sœur bien qu'espouse du Prince & heritier presomptif, si est-ce que le pere pouuant suruiure le fils, il n'ya point de cretitude qu'elle puisse porter la mesme qualité. Mais pour les conditions, & les aduantages le proffit en est entierement à luy, Et encore qu'il semble qu'és eschanges de personnes sans retour se trouue de l'esgalité : Si est-ce que bien considerees, il en peut par le temps tirer vtilité & nous point du tout, V. M. en est entierement forclosé par le moyen des renonciations que l'on vous a fait faire à toutes successions futures avec des clauses si extraordinaires qu'il semble qu'il aye pris subiect de l'exheredation de la Princesse la fille, sur l'honneur que vous luy faites de la faire compagne de vostre liët, & de vos Couronnes. Se vit il iamais de telles conditions ? La faire habille à succeder, en cas qu'elle n'ait point d'enfans, & qu'elle s'en retourne en son pays, & la desheriter entierement en cas que Dieu vous donne posterité d'elle. Seroit-ce pas luy donner subiect de ne la souhaiçter puisque par ce moyen elle est priuee de ce que la nature ne luy peut autrement desoler : Si leurs femmes peuuent succeder à leurs Couronnes, pourquoy en serôt elles excluses espousant nos Roys Est-ce qu'ils ne soient pas dignes de les porter ? quelle aduantage en tire donc vostre Maïesté ? Elle espouse à la verité la fille d'un grand Prince, mais toute nue sans commodité, sans esperance quelconque. De dire que le Prince espouse Madame sans qu'il en couste à vostre Maïesté il est vray, mais aussi Madame peut succeder à des Couronnes ou au droit d'icelles : Et quand ils n'en tireroient autre aduantage, que l'es-

perance d'un droit legitime de profession qu'ils n'ont point, & ne peuvent auoir qu'en l'espousant. N'est-ce pas pour eux vne condition tres aduantageuse? D'ailleurs en ces conuentions on exclud point Madame de la succession dont elle est capable. On luy en laisse le droit tout entier: Et pourquoy donc oster celuy de leur Princeesse? Si par l'vnion de toutes leurs Couronnes, en leur maison, ils la veulent maintenir en la grandeur ou elle est: N'aurions nous pas mesme loy de le faire des nostre, Sire, vostre Maiesté void l'inegalité qu'il y a és conditions & aduantages de telles alliances, passées neanmoins à la face de tant de beaux & grâds esprits. D'où vient cela, Sire si ce n'est qu'ils ayent encores de ce vieil Catholicon d'Espagne, dans le cœur & sur les leures.

Encores n'est-ce pas tout: chacun doit faire raison à son amy, ne retenant son bien avec iniustice, ains le luy doit restituer, autrement l'honneur de celuy qui se trouue despoüillé y est engagé. Or Sire vostre Maiesté a ce repos de conscience, qu'il ne possede de piece quelconque de l'Espagne: Autre-fois vos predecesseurs Roys ont iouy sur eux paisiblement le Comté de Roussillon, Mais plus iustes qu'ils n'ont esté depuis enuers eux: ils le leurs ont liberalement restitué. Et eux, Sire, Ne vous retiennent pas seulement quelque petite Comté: mais des Royaumes tous entiers, de grandes Duchez, de grandes Comtez. Chacun sçait qu'ils ont vsurpé sur nos Roys, les Royaumes de Naples, & de Scicile, le Duché de Milan, la souueraineté de Flandres, & du Comté de Bourgongne (Et ce que ie ne puis dire à V. M. sans larmes) Vostre Couronne de Nauarre, l'ancien patrimoine de vos ancestres. Qu'est cela, Sire, Trois Royaumes, vne grande Duché, deux grandes Comtez. Hé quoy, Quel amy est cecy. qui se remplit

des commoditez de son amy, qui luy rait son bien, & encores ose luy presenter la main toute plaine de ses despoüilles, Est-ce point, Sire pour vous tirer ce qui vous reste, Sire, Sire, retirez-vous. Ne touchez en ceste main rauissante. Prenez garde qu'elle n'acheue ce que depuis tant de temps elle poursuit: Il y va de l'honneur & de la conscience, l'un & l'autre nous oblige à la conseruation de ce qui nous est laissé de nos peres. Hé quoy, le bien dont est question ne le merite-il pas, Laissons celuy d'Italie, de Flandres, & de Bourgongne, (Bien que tresiulement vostre) & parlons de celuy qui ne vous peut estre contesté. Est-il raisonnable, SIRE, & hontable qu'il contracte avec vostre Majesté les mains garnies de vostre bien: De ce bien qui est tant vostre que vos plus grands ennemis, & luy-mesmes, qui en est l'iniuste derempreur, sera contrainct de le confesser, SIRE, quands ils l'auroient enuahy sur leurs ennemis, & sous loy de la guerre, (bien qu'il ne soit permis des s'introniser au bien d'autrui:) Si est-ce qu'il seroit plus excusable: mais de l'auoir fait par trahison, sous vn faux pretexte, sans guerre prealable, & sur leurs proches parens, la cause desquels nature les obligeoit de prendre en main contre tous, Ceste procedure tant iniuste, rend le fait si odieux, que vostre M. sera blasmee eternellement, si elle ne s'en fait faire raison & afin que vostre Maiesté en soit esclaircie, qu'elle prenne la peine de s'en faire lire l'Histoire, ou de le faire soy-mesme, l'occupation est bié digne de v. M. elle verra de la pitié, s'il y en eut iamais en occurance, quelconque: En voicy l'abregé.

SIRE, Regnant en Nauarre Ian III. du nom de la maison d'Albret, & Catherine sa femme (à qui la Couronne appartenoit de son estoch) Le Pape Iules II. natif de Sauonne, homme cruel, & le vray

boutefeux de la Chrestienté en son temps, portant vne haine irrecōciliable au Roy Louys XII. pere du peuple, d'un des predecesseurs, (à qui ladicte Catherine attouchoit de proximité de sang) duquel toutesfois il s'estoit aydé vtilement en beaucoup d'occasions, sous pretexte que ce bon Prince, ne vouloit quitter la protection du Duc de Ferrare, son allié, que ce Pape vouloit opprimer iniustement, luy des-vnit la pluspart de ses alliés, & les luy opposant pour le trauerser és guerres, qu'il faisoit pour le recouurement de son Duché de Milan, les suscite encores pour la luy faire dedans son propre Estat, & pour leur en donner quelque pretexte plausible, excommunie le susdict Roy Louys, & tous ses alliez, Au nombre desquels estoit le susdict Roy Iean de Nauarre, donnant leurs Estats au premier occupant: Ferdinand vostre Roy de Castille & Arragon, grand Prince, mais sans foy, sans pitié, sans humanité, lequel vn an auparauant auoit iuré alliance avec le dit Roy Louys : voyant l'occasion propre de faire ses affaires audit Royaume de Nauarre (apres lequel il void depuis, apres fort long temps, bien qu'il fust oncle de la susdite Catherine,) print suiet sur la dite excommunication de rompre ladicte alliance de France: & feignant de luy vouloir faire guerre en son pays l'enuoye ausdicts Roy & Roine de Nauarre leur demander passage en leurs terres pour son armee, laquelle cependant ne laisse d'entrer, & s'approchant de Pampelune, ville capitale dudit Royaume, en la quelle il auoit pratiqué des intelligences, par le moyen de certains traitres Beaumontois suiets, mais qui auoient grande creance dans ledit Estat, il se saisit de ladite ville de Pampelune, le vingt quatriesme Iuliet, mil cinq cens douze, & poursuivant son entreprise, s'empare facilement de

toutte

routes les autres villes dudit Estat, qui sont de la les Monts Si bien que ne luy ayant esté faire aucune resistance par le dit Roy Iean, pour auoir esté surpris & ne s'estre trouué forces suffisantes sus pied, il en seroit demeuré maître, & ledit Roy Iean contraint de se retirer en France, és terres qu'il y auoit, sans que depuis il luy fust possible, ny a les successeurs de rétrier en la possession dudit Estat. Lequel les Roys d'Espagne heritiers dudit Ferdinand, ont conserué & maintenu, du depuis en leur maison, comme ils s'ont encores. Et ce Roy Iean d'Albret, Sire estoit en droite ligne, tris-ayeul de vostre Maiesté ayant laissé de la dite Catherine Henry I son successeur, & luy Ieanne Royne de Nauarre, mere du feu Roy vostre pere. Tellement, Sire, que vostre Maiesté void le tort qui vous est fait par ledit Roy d'Espagne, en l'iniuste possession qu'il a de ceste Couronne, si legitime-mét vostre, & si iniustement vsurpee sur vos ancestres, Ces proches parens, par ses predecesseurs.

Sire, Dieu est iuste, il punit les hommes pour leurs demerites, mais aussi quand ils se recognoissent il retire son bras. Il a chastié vos predecesseurs Roys de Nauarre: Il semble qu'à present il en veille rompre les verges. Il s'est seruy d'un puissant Roy pour les corriger eux qui estoient foibles. Et qui sçait, Sire, s'il n'a point permis que ceste Couronne soit tombee en la maison de France grande & puissante expressement, afin de se seruir d'elle pour la releuer & la remettre sur vostre teste. Et qu'ayant esté rauie sur un Roy foible de reins, elle soit reconquise par un Roy fort & puissant: il seroit à l'aduanture excusable en un Roy de Nauarre, de n'entreprendre le recouurement de ce bel Estat contre un si puissant vsurpateur. Mais à un Roy de France, Sire il n'est pas seulement sans excuse, mais il seroit honteux, il seroit

50

vituperable. Et que serace donc si ce grand Roy touche en la main du ravisseur contracte alliance avec luy, & luy donne cōme vn titre de son larcin? Sire, chacun le sien n'est pas trop: Si ce prince recherche vostre amitié qu'il commence par la restitution de ce qu'il vous detient, apres cela bons amys bons aliés, il est m-l-aisé d'aymer ceux qui occupent nostre bien, il n'est pas iuste de le faire.

D'ailleurs, Sire, qu'elle grande assurance auez vous que le Roy d'Espagne recherche vostre alliance pour l'amitié qu'il vous porte? Est ce que ses predecesseurs ou luy ayēt tousiours procuré le bien & la grādeur de V. Estat? Qu'ils se soyēt éploiez ale vo^r cōseruer? Helas à qui le voudroit on persuader? Sire Parcourez toutes vos prouinces & y voyez les ruines de vos villes & de vos villages; ce sont les fruits de leur amour de leur soing & de leur diligēce. Demandez-lé à vos anciens, & ils vous diront que depuis cent ans & plus, ils n'ont cessé de trauailler v. Estat, soit par guerres ouuertes, ou par leurs menees & pratiques sourdes, desbauchās de tout leur pouuoir les sujets d'iceluy, & semans diuision entr'eux afin d'auancer leurs affaires dans ce desordre. Mais particulièrement Sire, que n'ont ils pas fait au preiudice du feu Roy v. pere? A-il tenu en eux qu'il ne se soit veu priué de ceste Couronne que Dieu luy auoit preparée depuis tant de siecles? Dequoy ne se sont ils point seruis pour paruenir à ce dessein? n'en sont ils pas venus iusques aux attentats sur sa personne, & sur sa vie? Sire V. M. me permettra s'il luy plaist de luy faire encores à ce suiet le recit d'une histoire tres veritable, tesmoignee par vn fort homme de bien d'entre vos suiets, employé en ceste action, comme estant lors Secretaire du Sieur de S. Suloise, Ambassadeur pour le Roy Charles neu-

hiesme, prez le Roy d'Espagne Philippes, pere de celuy à present regnant, de la bouche duquel ie le tiens, par lequel recit vostre Maiesté pourra iuger de la verité de ce que dessus.

Sire, en l'annee mil cinq cens soixante deux, le dict Roy Philippes tenant les Estats des Royaumes d'Aragon, Catalogne. & Valâce, en la ville de Mouzon, & la Royne d'Espagne Elizabeth, fille de Henry II. Roy de France, estant demeuree à Madril. Il arriva audit Madril vn nommé le Capitaine Dimache, qui se disoit venir de Portugal pour les affaires de l'Infante (ce qui estoit faux cōme il confessa depuis) estant demeuré malade, & incommodé au logis où il estoit, il s'informa s'il n'y auoit point en la ville de François, & ayant descouuert que la Royne en auoit vn valet de chambre, ill'enuoia prier de le venir voir, & apres luy auoir representé son incōmodité sur les offres à luy faites par le valet de chambre de sa maison, il le prit au mot, & s'y fit porter. Dans huit iours estant reconualu, & deuisant du suiet de son voyage avec son hôte, il luy confessa qu'il venoit de trouuer le Duc d'Albe de la part d'un Prince Estranger qui auoit lors la meilleure part au gouuernement des affaires de France (le fils duquel s'est veu depuis a deux doigts de s'en voir la Couronne sur le chef,) & tirant de sa malette vn paquet luy monstra quelques lettres dudit Duc d'Albe audit Roy Philippes, & à Dom François de Alaba pour luy faire donner audience, Le suiet desdites lettres & de son voyage, estoit pour favoriser vne entreprise dressée contre la Royne de Nauarre v. ayeulle, & ses enfans qui estoient le feu Roy v. pere, & deffuncte Madame Cachetine sa sœur, tous lesquels estoient lors en Bearn en leur ville de Pau, Et cela afin de se saisir de leurs personnes, & les mener tous à l'inqui-

sition en Espagne. Le dessein de l'exécution estoit
 tel. Le Roy d'Espagne auoit vne grolle armee toute
 preste a barecelone, destinee (selon le pretexte) pour
 la Flandre: Il en deuoit faire passer x. ou 12. mil hom-
 mes, le long des montagnes de Foix, iusques a Pau;
 Où estans assistez des Sieurs de Monluc, d'Escarts,
 & d'orthé, qui estoient de la partie ausquels ce Prin-
 ce estranger en auoit escrit, ils deuoient surprendre
 ladite Roynie de Nauarre, dans la dite ville de Pau.
 Comme ils eussent fait infailiblement (n'estant en
 aucune defiance,) Si ce valet de chabre n'eust trou-
 ué moyen d'en faire aduertir la Roynie d'Espagne,
 qui despechant aussi tost audir sieur de S. Sulpice
 Ambassadeur, qui estoit pres du Roy. comanda d'e-
 escrire au dit feu Roy Charles, & d'en faire aduertir
 en passât ladite Roynie de Nauarre, avec charge ex-
 presse de faire preudregarde à ce que deuiedroit le-
 dit Capitaine Dimanche: lequel estant pres du Roy
 & descouuert par ledit sieur Ambassadeur, fut re-
 marqué que 3. ou 4. audiences luy furent donnees
 de nuit, sous la conduite dudit Alaba, & reuoué en
 diligence vers ceux qui l'auoient depesché. A l'heure
 mesme ledit sieur Ambassadeur le fit suivre, par le
 personnage de qui ie tiens ceste Histoire, avec des-
 pesches au Roy, & lettres de creance pour la Roynie
 de Nauarre lesquelles il luy rendit en passât & après
 luy auoir discouru amplement de tout le fait, conti-
 nuant son voyage, se rendit a la Cour du Roy, aussi
 tost que le dit Capitaine Dimanche lequel aduertit
 de l'arriuee dudit Secrétaire, & se doutant qu'il pou-
 uoit estre descouuert, se tint caché, si bien que quel-
 que exacte perquisition qui s'en fist on ne peut ia-
 mais auoir autres nouuelles; de sorte que leur mine
 estant esuentee, elle ne peut faire aucun effet.

Et voila, Sire, comme ces Princes ont iouliours

aimé vos pères, comme ils font encores vostre M.
tant que la commodité de leurs affaires le peut per-
mettre, & qu'ils trouueront de quoy s'establis. Ils
voyoient bien que ce Prince, vostre Pere, qui des
ses ieunes ans tesmoingnoit vn grand courage, leur
estoit vn obstacle: pour la paisible iouissance de leur
vlturpation; que luy & Madame sa sœur, esteints &
consumez du feu de leur inquisition, Ils n'auroient
plus que craindre, ne restans que de foibles & de-
biles heritiers impuissans pour vne si haute con-
queste, Et c'est ainsi que ces Princes se sont faicts
grands, C'est en l'vsage de ces moyens qu'ils ont a-
massé tât de couronnes l'une sur l'autre. Ils n'estoient
que petits Roytelets de Castille, n'y a pas fix. vingts
ans, leurs inuentions, leurs menées, leur mauuaise foy,
leur ambition, & leur auarice insatiable les ont ac-
creuz ainsi que vous les voyez, au despés de tous les
Estats du monde: Et spécialement de celuy de Fran-
ce. Et apres cela Sire V. M. luy voudra toucher en la
main, contracter vn accord d'alliance si estroite avec
luy. Hé que diroient les nations? Qu'un Roy de Fra-
nce lié conditionné, en entrant en vn âge fort & vi-
goureux, martial, aimé, chery de ses peuples, peuple
en grand nōbre, riche, puissant, & courageux, offen-
cé en tant de sortes, despoüille de son bien, dōnera la
main d'affociation a l'vlturpateur, a son ennemy?
Ennemy capital, qui ne traueille qu'a la ruine? Las!
pauvre France, quel peché, qu'elle fauté s'a rendu si
coupable que d'en courir vne si rigoureuse puni-
tion? Et qui faille que ton fleau vniuersel triomphe
de toy, qu'il soit vomy dans ton giron, comme ve-
nin cōtagieux aux extremitez, par vne vertu expul-
sive de la nature, afin qu'il exerce contre toy la der-
niere rage & fureur? Pardonnez moy, Sire, si ie passe
les bornes de la modestie: donnez cela à la iuste

douleur qui me point, pour le triste ressouvenir de nos malheurs passez, & l'aprehension que j'ay d'une recheutte. Et Dieu veuille, Sire, que ie n'é sois point le prophete. Si est-ce que j'oseray dire à V. M. & la supplie tres-humblement de s'en souvenir, que la perfection de telles alliances, ne luy peut apporter qu'un repentir en croupe.

Mais quand bien toutes ces raisons particulieres à vostre M. ne seroient considerables, l'interest public, Sire, le vous doit estre. Quelle commodité, quel aduantage luy en reuient-il? La communication de ses peuples, vous est tant à contre-cœur, pour leur fierté & arrogance, que le seul nō nous en est odieux. Sire, Nous nous passerons fort bien de tels freres, leur frequentatiō nous couste trop. Nous vous supplierions tres-volontiers, de les laisser dans leur Montagnes, & nous permettre sās (eux sous V. M.) l'usage de nos plaines. De quoy nous seruent ils? que nous amenēt-ils, que de la depence? qu'est-ce qu'ils nous enuoient pour ameliorer nostre condition, Rien du tout, Sire, qui soit necessaire? Ils nous enuoient des pistolles: mais pour corrompre nostre fidelité: et pleue à Dieu qu'ils n'en fussēt pas si liberaux: nous ne verrions parmy nous tant de traistres, tant d'hommes de snaturez. Et donc, puis qu'elles ne nous seruent que de tresbuchement, pourquoy tant de passion pour ces alliances: Contentons-nous, contentons-nous, Sire, du passé, & nous faisons sage par nos exemples. Ainsi le font ceux qui aiment leur conseruation. Ce faisant, V. M. en remportera le titre de grand & de sage, & vos peuples la paix & le repos entr'eux, à la splendeur de tout vostre Estat.

Or, Sire, Ce n'est pas tout d'auoir veu comme quoy vous pourrez cōtracter, en qu'elle main vous pourrez toucher vilement. Il faut encores aduiser

de ne porter point d'âneau estroit. De ne vous mettre pas vous mesmes aux fers, de ne vous assuiettir pas mal à propos. Et cela, Sire, est de tant plus considerable V. M. que V. autorité Royale y receuroit de l'interest autorité comme absolüe, aussi qui doit estre plus libre & moins suiette a captiuité & seruitude. Les Rois asservissent les autres hômes, eux seuls demeurent libres, en toutes autres choses qu'au deuoir de iustice, a quoy ils leurs sont obligez & ceste seruitude est qui les fait Roys & libres. De ceste obligation. Sire, V. M. nes'en peut descharger & ne le doit. C'est vne charge fonciere annexee a v. Couronne, dont vous leur estes redeuables. Et toute autre chose vous deuez vous en exempter, si vous estes ialoux dela charge qui vous est commise.

Or en ce deuoir de iustice sont compristoutes les exceptions qui se peuuent representer en ceste liberté des Princes. Car bien qu'ils ayent autorité de tout faire si est-ce que la iustice veut qu'ils s'assuiettissent à ne rié faire que de iuste & d'équitable. Et ceste équité qu'ils maintiennent leurs peuples en paix, & que pour ce faire ils vsent de tous moyens propres & expediés : mesmes iusques à ce qui pourroit sembler faire preiudice à leur autorite: car s'assuiettissant en ceste maniere, ils se mettét en liberté commandans d'vne puissance plus absoluë, par l'obeissance volontaire de leurs peuples, & c'est en ses occurrâces que doit luire le plus leur sagesse & prudence, par la difficulté que ce leur est de desroger à ceste puissance vniuerselle, qu'ils ont sur leurs sujets en leur relaschant pour le bié de la paix quelque chose de l'autorité.

V. M. SIRE, commande vn peuple, vers lequel il luy est necessaire d'vsar de ceste benignité: La di-

uersité des sentimens de leur foy, luy en estant vne
 matiere ordinaire, par la diuisiō qu'elle produit en-
 tre eux. En ces occasions, Sire V. M. doit aller avec
 circonspection, & ne s'arrester pas tant a la conser-
 uation exacte de son autorité, cōme a la conserua-
 tion de la iustice & a l'amour qu'il doit a ses peuples.
 Or le principal membre de iustice, est celuy qui re-
 garde le seruice que tous les hommes doiuent a Dieu
 Auquēl ils ne peuuent estre empeschez, mais il est de
 V. deuoir, puis que c'est la volonté de nostre Dieu
 commun, de remettre encore pour quelque tēps,
 la reünion entiere de ses fidesles on son Eglise, d'en
 attendre le temps & la saison: & cependant vser de
 tous moyens a cēt effect. Aucuns de vos predeces-
 seurs mal cōseillez en ont pratriqué le plus violent:
 mais avec ruine & dommage. Le feu Roy V. perē,
 grand Prince & sage vous en a mōstré de plus doux
 & de meilleurs. Et V. M. void, cōme quoy il s'en est
 trouué: avec la paix vniuerselle, l'abōdāce de toutes
 choses, & la conseruation de plusieurs esprits, il en a
 r'empōrté l'amour passionné de tous ses peuples, qui
 de luy est descendue iusques a vous: Si bien que la
 memoire de son Auguste nom luy est de plus en plus ma-
 tiere de larmes iournalieres. Outre qu'a cela vous estes ob-
 lige par iustice, & le deuoir qui est deu a Dieu, vous l'estes
 encor par l'amour que vous leur deuez, comme leur Roy:
 Et cet amour veut que vous preferiez a vostre particulier,
 leur bien & leur repos: pourueu qu'aussi ils ne s'esloignent
 de ce qu'ils vous doiuent: Mais qu'en la recognoissance
 de V. M. ils luy obeissent & la seruent avec la fidelité re-
 quise a bons & naturels subiects. De ceste subiection vo-
 lontaire a laquelle vous vous submettez: V. M. ny vostre
 Estat ny reçoit aucun eschec. La Couronne & le Sceptre
 vous en demeurent: Et si ie l'ose dire, avec plus de
 fermeté qu'autrement. Ceste diuersité bien mesagée pou-
 uant seruir de bride pour retenir en deuoir toutes choses:
 & de cōtrepois aux mauuaises humeurs de vostre Estat.

Sire,

Sire, voicy vn autre subiection à laquelle vostre Majesté est encores obligee: de tāt pl^e forte qu'elle est vne des colonnes sur lesquelles vostre Monarchie est fondee, & qui est tant de son essence qu'il n'est pas au pouuoir de son Prince de l'alterer sans violer les loix fondamantales de l'Estat. C'est celle qui vous oblige a suivre les resolutions qui sont prises és assemblées des trois Estats de vostre Royaume legitimement conuoez, les Roys vos predecesseurs, Sire, n'ont point trouué de moyē plus prōpt pour remedier aux maladies violentes de leur Estat que d'vser de ce remede cōme le plus doux & le plus iuste de tant plus qu'il doit estre sans violence & sans contraincte, & qu'iceluy tous les membres du corps dont vous estes le chef peuuent librement représenter leurs vlceres, faire leurs plainctes & doleances, pour sur icelles leur estre pourueu de remede conuenable pour leur bien & guerison.

Or Sire, comme en ceste actiō le Prince daigne bien communiquer en quelque facon son autorité, a ses subiects: Aussi est il de son deuoir puisque volontairement il s'y soubmet de ne leur y faire violence: mais de les laisser libres, & en leurs personnes, & en leurs voix, afin que les choses qui y seront traitées passent selon qu'il sera trouué expedient & iuste, le le vous dicts, Sire, d'autant que la malice du siecle où nous sōmes encore n'a pas tousiours donné a ceste cōpagnie la liberté qu'elle doit auoir. Ils s'est fait depuis loixāte ans quelques assemblees d'Estats, mais plustost a ruine qu'a restauration: Ou si les desseins en ont esté bons & legitimes, la suite en a esté corompue par les artifices de ceux qui n'auoyent riē moins au cœur, que

l'amour & grandeur du Prince, & la reformation du desordre en l'Estat. Mais qui sous ces beaux & specieux pretextes visoyent seulement à leur establissement, & aux moyens pour paruenir au but particulier qu'ils s'estoient proposé. Aussi de telles assemblees le public n'a remporté que ruyne, & desolation, au lieu de l'ordre & du repos qu'il y deuoit trouuer.

Vostre Majesté, Sire, meüé d'un saint desir & affection de voir son Estat refflorir & reprendre le mesme lustre qu'il auoit du viuant du feu Roy son pere, & chasser le desordre qui s'y est glissé pendât sa Minorité: A trouué bon de conuoquer l'assemblée desdits trois Estats de son Royaume, pour sur cela prendre leurs bons aduis & cōseil, & trouuer les moyens conuenables pour son reestablissement. Vostre Majesté a pris vne resolution digne d'elle. Il ne reste plus qu'à l'executer sincerement. Et à cela, Sire, vous deuez vaquer courageusement, comme à chose de laquelle vous tirez honneur & vtilité, honneur pource que ceste action vous sera vn tesmoin sās reproche de vostre zele enuers vostre Estat & vos peuples, & du soin que vous auez d'augmenter leur gloire, Vtilité d'autant que par le reglemēt de vos affaires vo' aurez plus de moyen d'entretenir les despences necessaires pour le maintenir en paix, sans vser de moyens extraordinaires à la foule & surcharge de vostre peuple, mais aussi deuez vous aduiser que sous ombre de vostre auctorité la corruption n'y entre poinct. car vous y feriez vne rencontre toute opposée qui ne pourroit qu'alterer bien fort son repos. Que vostre majesté considere que ceste assemblee represente le corps de tout vostre Estat, & bien qu'elle ne soit

composee que de peu de personnes au regard de ceste grande multitude qui vit en iceluy: si est-ce que ses petites rouës par leur harmonie peuent faire iouer le grãd ressort & le disposer a la mesure qu'elles luy voudront donner: si bien que si elles sont violentes outre leur cours ordinaire, il est a craindre qu'elles ne le facent entrer en de faux accords, & en fin en vn desuoiemẽt general qui ne pourroit causer qu'une maladie vniuerselle tant au chef cõme aux membres. Les derniers Estats d'Orleans & de Bloys vous en feront foy, comme ayant esté de la qualité de ceux qui ont dõné leur coup a cest Estat, & l'ont reduict aux aboys que nous l'auõs veu par les moyens que vostre Majesté est conseillée de fuir elle l'en veut garẽtir. Mais au cõtraire pour en tirer le fruiet des legitimes & tel qu'elle peut esperer de ceste conuocation. que vostre majesté ne permette en quelque sorte que ce soit la desbauche des deputez: mais qu'elle les reçoie au mesme Estat qu'ils sõt venus sans que l'artifice opere en leur endroict soit par promesses intimidations, ou autres moyens par lesquels ils se pourroient corrompre. Qu'elle ait en execration ceux d'entr'eux, qu'elle verra se laisser induire & emporter a autres affections, que celles qui auront leurs consciẽces pour iuges & tesmoins de leur deuotion, au bien de l'Estat, les maudisse avec Dieu, comme preuarcateurs, traistres & deserteurs de leur patrie, larrõs publics, mercenaires lasches & vilains, & ennemis de la France. Qu'elle reçoie benignement leur doleances, & leur face droict: Qu'elle poise diligẽment les aduis qui luy seront donnez, pour le reglement de son Estat, & ne les mesure qu'a l'aune de l'vtilité publique, sans autre consideration:

qu'elle face obseruer de point en point ce qui y
sera resolu, sans contrauention de quique ce soit.
Si vostre Majesté faict ces choses, elle verra en peu
de temps renaistre ceste belle fleur de Lys qui s'é
va morte, & son Estat reprendre la vigueur que
vostre Minorité luy a raine.

Il y a encores, Sire, vne seruitude, à laquelle V. M.
se doit ranger, cōme celle qui a aussi la Iustice pour
garand; & celle là consiste és iustes refus que vos
officiers souverains peuuent faire de vos Edicts,
non poisez à la balance. et ceste subiection despēd
toufiours de ce deuoir du bon Roy, de ne cōman
der que choses iustes. Et partār, il vous sera hono
rable, pour n'encourir le tiltre opposé de vous as
fuiettir. Les roys par importunité ou mauuais cō
seil, mesme souuent contre leur volonté peuuent
cōmander des choses esloignées de la raison, l'ex
ecution desquelles pourroit faire breche à leur
grandeur, s'ils ne se soubmettoient à ceste correc
tion. Ce faisāt vous euntez tout reproche, & le blas
me qui vient sur ceux qui abusent de ce pouuoir
absolu, qui leur est dōné; vos ancestres les ont à ce
ste fin establis: auants voulu par ce moyen comme
refrener ceste grande authorité qu'ils ont; afin d'ē
retenir l'excez, & qu'elle ne passe iusqu'aux vices.
Les plus absolus d'entr'eux, si font volontairemēt
abstraincts és choses importantes. Et entre iceux
Loys 9. (le plus eurier à l'execution de ses volon
tez, qui ait esté auparauant) qui a fait dire de luy
qu'il auoit mis nos roys hors de page: Neauuōins
on dit, qu'ayant fait presenter à la Court, vn Edict
qui estoit à la foule du peuple, lequel auroit esté
refusé, apres plusieurs commandemens par luy
faicts, & reyterez, & les remonstrances de ladicte

Cour sur iceux, iusqu'à se vouloir desister de l'exercice de leurs charges, & les luy remettre. En fin ayant recogneu son tort, & s'estant laissé emporter à la force de la iustice, luy iura de ne la violéter desormais, en ce qui seroit de son deuoir. Nous auons encores de ceste soubmission de nos Roys plusieurs autres exéples notables, mais celuy-cy suffira pour vous faire voir que bien qu'ils peussent toute chose, qu'ils se sont voulu toutesfois assuiection à cet ordre, afin que V. M. face le semblable à la grande gloire & honneur.

Voilà, Sire, comme quoy vous pourrez porter vn anneau estroit: mais voicy cōme vous vous en deuez de charger: voicy la subiection que vous deuez euer, qu'és affaires de vostre Estat, esquelles il n'y a point de la paix publique, mais qui consistēt seulement en maniment & conduite. V. M. prenne garde que s'en deschargeant sur autrui, elle n'esfuie à vne necessité de passer par la volonté & discretion de ceux qu'elle y aura commis: mais elle doit en se soulageant s'en faire neau moins rendre compte, & retenir tousiours par deuers elle l'autorité de la reprēdre toutes & quantes fois qu'elle trouuera à propos de le faire. Car outre qu'il est biē seant à vn Prince, de scauoir ce qui se passe dās son Estat, & que tel soin accroist son autorité, il euitera le danger que ses seruiteurs s'oubliās de leur deuoir, facent monopoles à son preiudice,

V. M. doit encōres aduiser de ne hausser point tellement le degré de ses seruiteurs, que quand il voudroit il ne les pēut reduire: & celle là est la subiection la plus dangereuse de toutes, cōme celle qui dōne quelquefois aux seruiteurs l'audace de vouloir deuenir Maistres. Et à cela aydēt merueilleusement les grandes charges, mesmesquād elles sont cō-

tinuées dans les grandes familles. La longue possession donnant aux titulaires d'icelles des avantages, qu'il est apres mal-ayse de retrancher qu'auec violence. C'est pourquoy V. M. doit prédre garde de ne les autoriser pas, tellement qu'elle en puisse estre bridee en ses volonteiz. Et si V. M. vouloit faire vne œuvre digne d'elle, elle rendroit triennales les charges importantes de son Estat, & les gouuernemens: outre que ces changements seroient des recompenses honorables aux fidelles seruitices, & vn prix de sirable aux belles ames: V. M. euiroit les entreprises qu'on peut bastir sur vne si longue possession, l'exécution en seroit facile, la resolution en estant prise, de l'aduis desdits Estats generaux, & en laissant iouyr leur vie durant ceux qui en sont à present pourueus.

Mais, Sire, il y a encores vne seruitude en laquelle V. M. peut entrer, qui est de tant plus dangereuse, qu'elle a pour objet la nature & la pieté: pour preuue de ce que ie dis, ie me cōtēteray de vous supplier de voir les Histoires, des Roys François II. Charles IX. & Henry III. Vous y en pourrez remarquer les causes, comme estās ces histoires toutes pleines de tragiques euenemens, causez par la facilité de ses Princes, à s'asservir sans mesure ny ordre quelcō que. Ie vo⁹ les propose, Sire, pour fuir, nō pour ensuiure les moyēs des gouuernemēts y pratiquez: au cōtraire ie pēserois vous dōner cōseil vtile, si ie vous disois en general, de faire chose du tout opposee. Car en icelles vous y verrez dès le cōmencement iusqu'à la fin, vne Tragedie diuersifiee en mille sortes, iouee sur le Theatre de nostre Frāce, par les pl⁹ grāds & si gnales de tout l'Estat: Le tout (sous ōbre de gouuernement) pour luy faire chāger de main. Vous y verrez quatre ieunes Princes, les aucuns de grande es-

perâce, mais abastardisés desbauches, par l'artifice des Gouverneurs, a fin de regir toutes choses absolumēt, & se preparer de tāt mieux la voye, pour paruenir a leurs desseins. Vous y verrez vne grande Princeſſe, d'un grand & admirable esprit, mais ambitieux & conuoiteux du cōmandement, pour se maītenir en autorité, se seruir des Princes Estrāgers, contre les Princes du Sang: Et a cestefin faire iouer des ressorts innombrables tantost de violence, tātost de douceur, Aiourd'huy de paix, demain de guerre, tousiours pour dominer, dans ce desordre, & disposer de routes choses. Vous y verrez des Princes du sang, vieux & ieunes: (neantmoins tres courageux) maltraitez, baffoūez contraints par les affronts qui leur estoīēt faits de s'absenter de leurs Cours, & tascher de cōseruer leur rang par la force, qu'ils ne pouuoient faire par la raison. Vous y verrez des États generaux conuocquez, pour seruir de leurre a surprendre lesdits Princes du sang & s'en deffaire. Vous y verrez des Princes estrangers seruiteurs sous le manreau del'autorité du Roy, vsfer de toutes sortes d'inuētions & d'artifices, pour supplanter lesdits Princes du Sang, se mettre en leurs places, & la Couronne sur leurs testes. Vous y verrez lesdits Princes estrangers, sous pretexte de Religion, & d'enaffectionner la deffence, conseiller des carnages, & les executer, à fin d'y enuelopper lesdits Princes. Vous les y verrez honorez des principales charges del'Estat Conduire les armées Royales faire des ligue & monopoles avec les estrangers, avec les subiects desdicts Roys, diffamer leurs noms, & par escrits, & par paroles: Auoir des langues à loūange, pour celebrer leurs vertus, & la Nobles-

se de leurs maisōs faire courir des genealogies par
my le peuple cōme s'ils eussent esté les vrays heri-
ritiers de la Couronne, & qu'a tort elle eut esté v-
surpee sur leurs deuāciars. Bref des Princes caual-
ler si biē les esprits des peuples, que peu s'ē a fallu
qu'ils ne soient paruenus par leur moyē a ce haut
degrē d'honneur, ou ils aspiroient, avec tāt d'ai-
dité & de cōuoitise. Et tout cela, Sire, pour auoir
donné trop liberallement leur autorité a manier,
à personnes qui n'estoient pas capables d'en bien
vser: & desquelles par certains respects, ils n'osoiet
pas la retirer, quand ils eussent bien voulu.

Sire, Si V. M. veut euitier tous ces desordres, & ne
se mettre soy-mesme aux fers. Qu'al'exemple du
feu Roy son pere, elle ne dōne le manimēt gene-
ral de ses affaires (specialemēt de ses fināces) qu'à
personne capable, de le faire soy-mesme: car la
multitude engēdre confusion) qui vous en puisse
respōdre: Que vous puissiez punir en cas d'abus:
& duquel vous le puissiez retirer quand bon vous
semblera, sans en estre retenu par aucun respect.
Que tous vos grands despendēt de vous, pour ne
leur donner de l'autorité, qu'autāt que vos affai-
res le permettrōt, & que V. M. n'y pourra vacquer
Qu'elle s'asseure des Princes de son Sang, par des
tesmoignages enuers eux de son amour, & bien-
veillance, & ne souffrir que leur rāg & leur dignité
soit mise en compromis. Si elle fait ces choses. V.
M. Sire se peut asseurer, d'une autorité parfaicte
en son Estat, & d'y regner avec autant de gloire &
d'honneur, qu'y a fait en son temps le feu Roy
son pere, dont sa memoire ne mourra iamais
qu'avec les siecles.